
CARMINA.

Quis leges hac?


Perf.

3

MATTHIÆ BUTTURINI

SALODIENSIS

CARMINA.



VENETIIS MDCCLXXXV.

EX TIPOGRAPHIA JOANNIS GATTI

SUPERIORUM FACULTATE.

INCLYTO VIRO
PETRO PISANO

MATTHIAS BUTTURINI

F.

JURE in patricium ad-
scriberis ordinem, spectata tui

a 3 ge-

generis nobilitate. Paucis hisce
 verbis juvat ea omnia comple-
 ti, quæ de te, Petre Pisane,
 patria statuit, quæ Roma sen-
 sit, quæ universa audit Euro-
 pa. Multa occurrunt, poeta-
 rum carminibus, & annalium
 monumentis consignanda, quæ
 possem hodie, de te dicturus,
 in medium adferre: sapientis-
 simorum hominum consensus,
 bonorum studia, ingenium &
 eloquentia oratorum, discepta-
 tionis præstantia & successus,
 ju-

judicum sanctitas, æquitas Principis, civium gratulationes, lætitia multitudinis, provincialium denique atque exterarum gentium expectatio & gaudium. At ego prorsus hæc missa facio, quum non a tantarum rerum celebritate & splendore, sed a mentis tue vi, animique liberalitate, in tui admirationem alliciar. Quæ divino singula beneficio evenisse puto, ut in te unum se tota converteret civitas, & qualis adolescens quantusque esset,

ses, plane cognosceret. Plurimum certe conferre solet Romana institutio, ut nobilissimi adolescentes litterarum, earumque artium, quæ litteris continentur, studium colant: ut intelligendi agendique rationem apprime discant: ut doctrinam cum suavitate morum conjungant: ut denique, omni solide eruditionis ac sapientiæ fruge in animum veluti traducta, otium sibi cum dignitate semper comparandum proponant. Sed tu,
Pe-

Petre Pisane, tuum quid ingenitum habes, umbratili exercitatione præstantius, & nativi, non adsciti plenum honoris. Nam vetus illa Pisano- rum indoles, quæ immortalibui Reipublicæ magno semper fuit ornamento, in te adeo eminet, ut ad virtutis disciplinam, ad rerum gerendarum modum, ad patrum ac principum officia non ab aliorum monitis, aut consuetudine, aut exemplo, sed ab ipsa natura informatum esse, om-

omnes facile intelligant. Potes
igitur alacri erectoque animo
in apertum quasi campum pro-
silire, ubi majorum tuorum ge-
sta & laudes sese exhibent atque
explicant. Te profecto nunquam
talis ac tanta deficiet indoles,
sive in Reipublicæ magistrati-
bus verferis, sive in provin-
ciarum administratione, sive
in legationibus, sive etiam, si
patria poscat, bellicis in rebus.
Communem hanc omnium opi-
nionem & spem satis ea con-
fir-

*firmant, quæ adolescens tum
in magnum discrimen vocatus,
tum ad summas opes erectus
peregisti. Etenim maximis ex-
pressam lineamentis ob oculos
nobis posuisti viri illius ima-
ginem, quem divinus Plato in
Charmide temperantem instituit,
sortem in Lacete, in Lyside
amicitiæ cultorem, a voluptate
alienum in Philebo, ubique au-
tem prudentem & justum. Qua-
re qui te noverint, hoc au-
spicato die, quo tibi, & Pifa-*

ne

na genti, & patriæ recte consultum est, tuorum facta recensere, teque, facie animisque eorum similem, laudibus efferre contendunt. Ego autem, posita verecundia illa, quam in publicum venientibus solet metus famæ objicere, carmina quadam, quæ vel puer lusi, vel adolescens effudi, te auspice, in lucem emitto, ut & hodiernus dies, quantum in me est, a me in honore habeatur, & singularis meæ erga te
ob-

observantiæ aliquod extet momentum. Vereor, ne hisce temporibus, in tanta scientiarum luce, reprehendar tum a philosophis, quod carmina tibi sistam, tum a poetis, quod mea. Tu vero omnium doctrinarum, quas vel judicii severitas, vel elegantia sermonis, vel rerum utilitas commendat, maxime studiosus adolescens, philosophos illos non audis, qui poetas, magnam & illustrem certe operam in civitatis disciplinam

im-

impedentes , audent contemne-
re. Quemadmodum summos poc-
tas ego quoque a teneris , ut
ita dicam , unguiculis amavi
& colui , utinam carmen vel
unum potuisssem aliquando ad
rectam eorum normam efficere .
Tunc equidem spei illius , in
quam ex tua tantum humanita-
te deveni , magnam ultro par-
tem in tua collocasssem doctrina .
Tu tamen , Petre Pisane , ho-
minis qui te suspexit , si mi-
nus ingenium , at voluntatem
illa

*illa animi tui amplitudine, cui
se totum ipse committit, fa-
cile probabis.*

VENETIIS. IV. KAL. JUN.

LIBER I.

Continet Odas, & Hendecasyllabos.

LIBER II.

Elegias, & Epigrammata.

LIBER III.

Quæ Hexametro carmine scripta sunt.

MAT-

I

MATHIÆ BUTTURINI
CARMINUM
LIBER PRIMUS.

I.

ANGELO EMO
EQUITI,

Veneta classis contra Tunetanos Imperatori.

EME (a), sacerdoti quæ vixi juncta Sichæo,
Manes infelicis Elisæ
Agnosce. Æterno manantia lumina fletu,
Et quod adhuc post sæcula multa
Alto vulnus hiat sub corde, atrosque tuere
Vultus. Eheu filia Beli
Quæ mala, quos casus, quos non sum passa labores!
Auro inhians opibusque mariti

Pyg-



(a) Didonis manes Emum alloquuntur.

A

Pygmalion, hunc Herculeas obtruncat ad aras.
Nocte silenti apparet imago -
Fœda viri, qualis tibi sistitur: impia regna,
Voce monet, fuge fratris avari.
Congestis clam thesauris, juvat ire per altum,
Et Týrios deferre sodales.
Naufragio elapsi, Lybicæ succedimus oræ,
Arvoque urbem ponimus empto,
Ah nimium capitis fidentes omine equini,
Fossa sub tellure reperti.
Dum vim inferre parat, thalamum dum poscit Iarbas,
Ausu mihi consciscere lethum,
Uxor Tartareas descendi fida sub umbras.
Hæc dum vixi, Fata severa,
Immerito Dīs invisam ac mortalibus ægris,
Vitali vel luce carentem
Me tetigere. Potens belli pacisque triumphis,
Atque heroum magna creatrix
Urbs quam condideram, Romani militis iras
Ter sensit. Vix littore quæras
Reliquias, aut deletæ vestigia Byrsæ.
Immortali carmine vates
Ausu sunt castæ proscindere nomina Didus.
Men' turpi succumbere culpæ?

Ex-

LIBER I.


Exfulis amplexu requiescere, jura pudoris
Oblitam, & regalia sceptrā?
Mittam, quam Stygia mecum sub nocte sepulti
Sæpe olli audivere querelam.
Nunc regnat, nunc convectat gens barbara prædas,
Qua steterant Carthaginis arces,
Insignique loci Genium, litusque verendum
Fœdat labe. Sed ira Deorum
Me premat æternum? Frustra nunc alloquar Emum?
Noverunt alta ostia Ditis,
Infernæque domus, Venetum quid pectora possint;
Et vestro de sanguine cretos
Vidi heroas ego, quos fortunata per arva,
Nobilium stipante caterva
Umbrarum, læto alloquitur meus Annibal ore.
Si te laus, si cura tuorum,
Si mala nostra movent, Dux, mæte ingentibus ausis,
Urge pugnam, ictosque profundo
Gurgite merge Afros: mea mœnia forte resurgent.
Talia vidit, & audiit Emus:
Devictus somno: interea de parte sinistra
Summa poli intonuere; diemque
Purpureis Aurora vehens super æquora bigis,
Classis late nantis ahena

Eduxit tenebris arma atque albentia vela,
Et somnos discussit, & umbram.

II.

GABRIELI TREVISANO

Benacensi Praefecto.

 EU nostra multo pallida crimine
 Ut marcet ætas! Fallere nescius
 Candor, verecundosque vultus
 Sæpe regens probitas, fidesque
 Terris recedunt. Per vetitum nefas
 Æris cupido dira ruit, neque
 Tristi reformidat rapina
 Sacra Diis temerare fana.
 Fœcunda culpæ semina patribus
 Ter nequiorum in progeniem fluunt,
 Urgentque naturæ supremum
 Opprobrium vitiosioris.
 Quisnam tot actas seditionibus
 Componat urbes? Frena licentiæ
 Effusa quisnam arctet, potentis
 Justitiæ, Aonidumque custos?

Pru-

Prudentiores imperium, Duces,
Tenete; pœna crimina vindice
Mulctare, virtutemque pulchris
Discite muneribus fovere.
Neglectum utrumque haud fata parat minus
Acerba regnis, quam manus impia
Victoris hostis. Vos avaræ
Perfidiae metuendus ultor,
Rectamque callens rebus in asperis
Servare mentem, vos docet integer
Princeps Trevisanus, Minervæ
Dulce decus, Themidisque cura:
Non hunc inanis gloria; non potens
Decepit aurum: contigit omnibus
Tutela præsens; nec gementum
Aura levis rapuit querelas.
Benacus alto hinc gurgite citrea
Tollit revinctum fronde caput, suis
Miratus in ripis beatos
Ire dies, veteresque mores.

III.

IN NUPTIAS

BARTOLOMÆI JULIARI

PATRICII VERONENSIS,

Post gravissimum ejus morbum.

NON quæque terris optima demetunt
Fati rapaces ante diem manus.
Avara mors nequicquam avitis
Adjicere hunc properabat umbris
Acrem Decorum præsidio virum,
Quem docta Pallas, quem Charites fovent
Ad pulchra natum, nec morantur
Otia, degeneresve curæ,
Nutrita castis sub penetralibus
Virtus, & ardor cedere nescius,
Stravere, Lucina volente,
Auspiciis thalamum secundis.
Longum ille vivat, Juppiter annuit
E summo Olympi vertice, conjugis

Di-

Dilectæ in amplexu daturus
Lætam animam, pueris relictis.

Quis tam beato prætulero toro
Erecta regum altaria nuptiis?
Faces maritæ ah sæpe belli
Horribilem explicuere flammam.

Prudentis o qui consilio Jovis
Auges bonorum pectora civium,
Ex Juliari stirpe cretos,
Pulcher Hymen, recrea perenni

Cura nepotes: sic face mutua
Flagret juvenus semper, & integris
Sic zona solvatur puellis
Semideum thalamo beandis.

IV.

AD EGREGIUM POETAM

MARCUM CAPELLUM

BRIXIENSEM,


Brachio laborantem.

NE dextra credas numina vatibus
Adeffe ſemper, Marce: pium caput
Vidi ſeveris ſape fatiſ
Expoſitum, rapidæque morti.
Quid civium mens recta, quid indoles
Auſta in reſſu Socraticæ domus
Poſſit, vel adverſis ſubacta
Rebus, amat docuiſſe vulgus
Sator Deorum. Mâſcula cædibus
Damniſque virtus cognita, luridas
Obliviones atque avaræ
Invidiam domat una Parcæ.
Vix ille dignus cingere Delphicam
Laurum, & Deorum ſedibus inferi,

Qui

Qui pace gaudentes Camœnas
 In tacita meditatur umbra,
 Ille, ille cingat, qui pedibus metus
 Subjecit omnes, tristitiæ potens, (a),
 Canitque, fortunamque magno
 Provocat assiduus duello,
 Tumultuosi fluctibus Hadriæ
 Actus paventum seu comitum audiat
 Lamenta; seu nimbo sonanti
 Desillens lapidosa grando,
 Late paternis sternat agris sata,
 Anni labores; sive gregi vago
 Incumbat, aut plantis maligna
 Luxuries, vel iniquus æstus.
 Quæ, Marce, sentis; exsere; neu ducem
 Culpes equorum, saxave tristitia,
 Si forte dejectus volanti
 Executias humerum quadriga.
 Quos te canoris edocuit jugis
 Pindi beatos Calliope modos,

Nunc



(a) Potens tristitiæ, vel iræ, vel superstitionis recte dicitur,
 qui ab hisce animi affectionibus se vinci non patitur.

Nunc fas inire, atque hospitales
Dicere carminibus penates.
Est Musa præfens: audiat, audiat
Vatem vel ægrum docta sodalium
Manus canentem, qualis udum
Dulcis olor gemit ad Caystrum.

V.

INCLYTIS VIRIS

DOMINICO CONDULMERO

BENACENSI PRÆFECTO,

ET FRANCISCO EJUS FRATRI

Antifisti Famaugustano.

SAT imperavit mollibus otiis,
Turpique luxu sæva Cupidinum
Mater; cruentas sat per orbem
Mars acuit metuendus iras.
Terris reducit jam sua sæcula
Astræa: nostris crimina finibus

UI-

Ultra pharetratos Gelonos
Ejiciet, rapidumque Tigrim.
Quos ante longa nocte coercitos
Avara tellus condiderat sinu,
Ad lumina atroces Catones
Elysiis rediere ab umbris.
Gaudete, cives; mittitur integer
Recturus urbes sanguis ab Hadria,
Insignis heroum parentum
Indole, & egregiis triumphis.
Pro re Latina, pro decore imperi,
Pro jure priscus vivit adhuc amor;
Extantque virtutes avitæ
Mentibus ingenitæ nepotum.
Nunc verberantem grandine & imbris
Rura, & tonantem nubibus arduis,
Nunc molle spirans ver, & almo
Sole dies placidos ferentem
Regnare rectum intelligimus Jovem.
Commisſa noſtri regna tenent Duces
Ritu Tonantis, ſeu ſceleſti
Terga viri fugientis acri
Petant flagello, ſeu faciles alant
Intaminatam non ſine gaudio

Pa-

Pacem per urbes, & difertas
Muneribus revocent Camœnas.
Benace felix! Te vice principes
Grata gubernant; rite videbimus
Parere Condulmero amœnas,
Quas habuit Trevisanus, oras.
Extolle lætis carminibus Ducem,
Ducisque fratrem; & difce, domesticum
Quid poffit exemplum, & beatis
Liminibus fimul aucla virtus.
Sic lucet omni fidere pulchrior
Sol; at profundo fplendidior vitro
Ardet repercuffus, fuifque
Se radiis ferit, & refultat.

VI.

In Sacrum Oratorem.

SIC eft: fupremi progenies patris
Aperta vultu, nudaque veritas
Splendore nativo refulget
Pulchra fatis, nec eget rotundo

Ser-

Sermone, nec vi divitis ingenî.

Cognata cælo gratia simplicem

Deducit hærens, atque limbo

Sanctus amor sequitur soluto,

Facunda cedunt carmina, tibiæ,

Et doctus amnes sistere eburneus

Pecten. Sophoclæo cothurno

Illa placet magis, illa frenat,

Urgetque mentes semper amabilis,

Semperque victrix. Macte, Dei potens

Orator, hanc, qualem magister

Edidit, eloquio nitenti

Docere, & alta mente reponere


Insiste: sic gens multa tibi lubens

Advertet aures; sic in ævum

Integra nos pietas manebit.

VII.

In Ædis Marcia Procuratorem.

UID præstet, & quid dedeceat, suos
Monere cives, Mercurialium
Hæc dos virorum est. Sæpe dives
Eloquii, ingeniique vena
Succurrit almis rectius urbibus,
Quam flava regis dextra Midæ queat,
Ex quo renidentis metalli
Semina concipiens, arenis
Pactolus olim palluit aureis.
Spectat benigno lumine Juppiter,
Ævumque fortunamque supra
Tollit humo, superisque miscet
Dîs eloquentem; dum tamen illius
Stet æqua mens, nec dissideat sibi,
Nec arctet, immittatve habenas
Aut populi arbitrio, aut potentum,
Heroas inter, quorum humeris honos
Salusque regni innititur, ordinem

Re-

Rerum gerendarum modumque
Ante oculos posuisse docta.

Sic ille legis Porcius Oppiæ
Assertor acer, nil muliebribus
Commotus ausis; sic Eois
Eminet, Hesperiiisque notus

Auctor Latini Tullius eloquæ;
Et qui profunda voce tonans, decus
Æternum Athænarum, potentis
Subruit insidias Philippi.

Quid parca virtus, quæ sibi consulat,
Oblivioso discrepat otio?
Laudanda, quæ prosit, supremæ
Assimilis, solidoque ductæ

Auro catenæ, quæ socialibus
Centum coercens orbibus annulos,
Summo axe suspendit trementes
Mole sua, pelagoque terras.

Testis mearum Cecropius Plato
Sententiarum est, Mæonidæ patris
Consultus interpres. Profanum
Multa nefas didicisse vulgus.

Audis, Georgi? Non ego plurima
Anciliorum, & cassidum, & ensium

Cœ-

Cœlamina, & stantes avorum
Effigies, veteresque fastos,
Non quidquid ad te spectat, & ad patres,
Natosque, longo carmine persequar,
Te Dîs, amicorum catervæ,
Et patriæ, imperioque cara
Virtus beatis auxit honoribus.
Laudes, & ostro splendida tegmina
Quæ sumis, huic cedunt: superbo hæc
Regum apice, hæc potior triumphis,

VIII.

Virtutis laudes,

SALVE, Deorum cura potentium,
Turpis repulsæ nescia; quis tuas,
Virtus, quis enarrasse laudes
Audeat, & posuisse metas?
Te læta cornu divite copia,
Te clara multis gloria honoribus,
Alma & voluptas, & virenti
Gratia nexa caput corona

Sti-

Stipant frequentes. Vulgus iners humi
Te nil moratur; sed fugiens rapit
Te penna supremas per oras,
Ocyor acriam sagitta
Scindente nubem. Solis, & Æoli
Intacta sedes aspicias, intimum
Cubile nec palles Tonantis
Per sonitus penetrare Olympi.
Mortalium, illis arcibus insidens,
Minuta longe pectora despicias,
Vexata curarum tumultu,
Ceum fragilem maris unda cymbam
Exercet. Illic spes avidas, metus,
Et stulta rides gaudia; nec Jovis
Iras in orbem, nec venena
Invidiæ, neque pertinacis
Metam extimescis tangere funeris.
Quid te tueri heu non datur? Improbos
Quid per labores, perque casus
Te posuere Dii parandam?
Terras colentem te bona Romuli
Gens vidit olim; nunc penitus lates,
Qualis, polo vix orta, fulgens
Fax liquidum occulitur sub æquor.

B

Nam

Nam quis Catones, aut Curios sequi
Curet? Cupido regnat, & Itali
Virtute mutarunt avita
Otia lenta, dapesque molles.

IX.

IN PIAM VIRGINEM

LAURAM PASSALAM.

DESPICI gaude, bona virgo: sacræ
Integrum serva penetrale sedis.
Ardeant multi, sine, sub nitenti
Luce videri.
Cerne, si mentem subit ampla mundi
Scena: discordis male trita vulgi
Fervet incurfu, miserisque passim
Perstrepit actis.
Pulsa ceu ventis seges huc & illuc
Flectitur, servum pecus, ægra turba.
Carpitur, carpit; videt, ac viderur;
Dicit, & audit.

Quis

Quis modus rebus, positusque finis?
O nimis sero dolitura! summa
Quum poli, atque imas quatiet supremus
Arbiter umbras.
Jam tuum, ah frustra, decus inuidebit
Illa; quæque horto viret in reposito
LAURUS, hæc cedros super & cupressos
Ardua surget.

X.

CAROLO ANTONIO MARINO

PRÆFECTO BENACENSIS.

SUMME regnator lyricæ cohortis;
Qui Deos, Regesque canens, Deorum
Stirpe prognatos, veteres sacraſti
Carminè Thebas,
Sic pater longum mancas in ævum,
Et tuo hærentem capiti coronam
Detrahat nunquam Tiberis, vel Arni
Æmulus ales,

B 2

Ad-

Adsis o, quæso, citharamque nervis
Præbeas doctam resonare septem,
Pindare, ut dignam meditemur æquo
 Principe Musam.

Fallor? An pennis ego Dædalæis
Certior tendo super astra? Dextrum
Sentio numen; levat aura parvum
 Obvia vatem.

Ætheris cellas video per oras
Aureo Astræam volitare curru,
Quem trahunt laxis generosa loris
 Colla leonum.

Virgini currum dedit alma Divum
Mater, Idæis ululata faxis;
Advola, dixit, mihi perge gratas
 Visere terras.

Miror insigni caput impeditum
Fronde, & albatem per inane vestem:
Non manu verber, scelerum nec ultor
 Emicat ensis.

Dextera quercus gerit illa ramum,
Altera lancem: facili verenda
Ore majestas sedet, ac serena
 Lumina rident.

Omen

Omen agnoscis, bona plebs? Beatæ
Carolus regnat moderator urbis;
Efficax priscum reparare, pacis
Arbiter, aurum.

Irrogat pœnam piger ille, munus
Dat celer ritu Jovis; & remisso
Utilis freno, placidaque gentem
Continet arte.

Civium custos simul, & sacerdos
Delii patris, studet æmulari
Orpheum, blandis fidibus morantem
Flumina & auras.

Hinc pedem, sera procul usque Thule
Exsules, sanctæ retulere Musæ,
Et boni mores, & aperta læto
Gratia vultu.

Dira nunc Gallus paret in Britannos
Armâ: vos vires sociate, Iberi;
Qua patent Nerei vada salsa, multas
Ducite naves.

Non ego quæram, trepidemve, quem fors
Ornet, aut virtus: spoliis superbæ
Non placent puppes mihi, non redemptæ
Sanguine lauri.

Pace flavescentes Ceres alma fruges,
 Pace jucundos Bromius racemos,
 Pace fert gratas oleas Camœnis
 Innuba Pallas,
 Spes, opes, artes, focus, ara faustis
 Dīs vigent passim; ingenuisque juncta
 Castitas curis, agit apta ruri
 Otia, & urbi.

XI.

De Amore.

CUR, Deum vitans male sanus, alta
 Solus abruptæ petis antra rupis?
 Quam potens arcet Deus, anne reddat
 Silva quietem?
 Sive Getulos, vel inhospitalem
 Caucasum, vel Bactra adeas, vel Indos,
 Sive pallentes tegat inter umbras
 Te niger Orcus,
 Semper ardenti jaculans sagitta
 Te sequar; longos gemitus ciebo

Semi-

Semper; & multum bibit hasta corde in-
Fixa cruorem.

Virginum spretor, Venerisque matris
Nostra risisti satis arma; duras
Et tuo dignas mihi, vane, solves
Crimine pœnas.

Claviger sensit domitor ferarum,
Tela quid possint mea; sensit ipse
Maximus Divûm, posuitque sæva
Fulmina dextra.

Hic amans inter fruticeta aprorum
Abdidit sese; fuit albus ales:
Aureus fluxit; mediisque taurus
Mugit undis.

Ipsè descendi Stygias ad undas
Victor; Ennæis rapui ipse campis
Matrè flaventi genitam, feroque
Dite jugavi.

In meum jactat caput hæc Cupido,
Imminens tergo. Nemorum recessus }
Quæro nequicquam, positurus ægras
Pectore curas.

Candidæ semper facies Elisæ
Saucio occurrit mihi vel remotis

Rupibus; mentemque oculosque imago
Vana fatigat.

Læta frons, crinis niger, ora blanda;
Multa pulchrarum simulacra rerum
Per fores ludunt animi, meantque
Semper, & errant.

Illa (quis credat?) vitreo sub amne,
Gramine in molli, iliceoque trunco,
Et mihi albenti per inane visa est
Obvia nube.

Sæpe Benaci virides ad oras
Arte ducentem facili choreas,
Sæpe texentem video resecto
Flore coronas.

Hei mihi! sæpe & voco, sed vocanti
Sola respondet memore e propinquo
Echo; fertque omnes levis huc & illuc
Aura querelas.

XII.

A D

ANDREAM ROTINGUM

SALODIENSEM;

Bacchanalia:

UID totnectere somnia?

Quid vel Bassaridum, vel Dryadum agmina,
Quæ silvis choreas agant

Potentve, ambiguo dicere carmine?
Jam non saxa per avia,

Non per rura Diis grata bicornibus,
Sed per Cenomanum oppida

Effusi populi plausibus, & rotis
Late pulsa sonantibus,

Rotinge, eximiis Orgia Bacchica
Exercentur honoribus.

Acris duxit hiems urbibus otia,
Quæ ver mox tepidum crepet.

Gaza multiplici, & marmore splendide

Com.

Complentur procerum domus,
Et pleâtris resonant, & strepitu pedum
In noctem. Indica poculis
Fumant dona, riget citreus amphora
Flaventi liquor; & gelu
Concreti latices membra calentia
Mulcent. Aspera flectitur
Lætis mixta choris fœmina; Cypria
Mater pectoribus faces
Subdit, vimque pigris addit amoribus.
Nos nec sub Veneris jugo
Flammæ spes recreat credula mutæ,
Nec laxant choreæ, neque
Pernox proposito dimovet alea.
Magnam Æneida maximæ
Conferre Iliadi nunc juvat, aut modos
Alta mente reponere,
Quos olim rapidum natus ad Ausidum
Romanæ Fidicen lyræ
Dircæo cecinit non minor alite.
Æquo haud corripiar patre,
Impellente animum pinguis & hispidi
Baldi heu volvere codices.
Interpono libris gaudia, fortior

Cer-

Certaturus ad arduam

Metam, te ultro sequens pulvere nobili.

XIII.

AD OPTIMUM AMICUM

VINCENTIUM DANDULUM:

CURA videri credulus alteri, &
Arcana legum ac vim fuge quærere,
Quidquid potentum mens severis
Jusserit arbitriis, aviti

Augere vires imperii efficax.

Quæ regna fulgent labe carentia?

Quæ jura conduntur, supernis

Ordinibus placitura, & imis?

Semper sub ictu vivitur. At boni

Debent alumni Socraticæ domus

Commune cum caris amicis,

Dandule, ferre jugum, ac filere.

In damna jactat se sua, retibus

Quæ colla quondam supposuit fera;

Sæ-

Sævoque cervices furore
Arctius, excutiens, revincit :
Sic Dî volunt, sic fata. Quis audeat
Inhospitalis sternere Caucaſi
Immane ſaxum? Quis voraci
Eripere ex aquila Prometheum?

XIV.

Ver.

Define, Muſa ;
Nocte ſub alta
Nectere Grajo
Impia regum
Facta cothurno ;
Deſine longum
Dicere bellum
Patris Homeri
Ore profundo.
Incipe, quæſo ;
Mollia mecum
Edere dulci

Car-

Carmina in umbra.

Talia poscit

Purpureum ver;

Talia flavus

Suadet Apollo,

Lucida Tauri

Signa revifens.

Ecce solutus

Montibus altis

Lene strepentî

Labitur amne

Vitreus humor.

Nulla sonoro

Turbine venti

Aere miscent

Prœlia: nullus

Candidus alta

Stat nive collis.

Ridet aperto

Lumine cælum;

Blanda tepentis

Aura Favonî

Corda relaxat;

Frondis honores

In-

Induit arbos;
Undique olenti
Germine vernat
Dædala tellus.
Mane rubenti
Lætus agrestem
Inflat avenam
Pastor, ovesque,
Gramina rore
Uda legentes,
Carminè mulcet:
Qui mare sævum
Nauta, nigrumque
Imbribus Austrum
Horruit altis
Naufragus undis,
Sortis iniquæ
Immemor ille,
Molliter aura
Flante, pererrat
Puppe resecta
Maxima Nerei
Stagna; canitque
Arma, virumque,

Te-

Teque furentem,
Saucia Dido.
Ultima linquens
Ostia Nili
Tranat hirundo
Aera pennis,
Ruraque ab anno
Itala lustrat.
Grata loquaci
Carmina ab ore
Audio: oberrat
Illa, lutoque
Undique lecto;
Construit altos
Provida nidos.
Rustica, Fauni,
Numina lætas
Ducere certant
Valle choreas;
Mixtaque palmas
Plurima nectit
Candida Nympha.
Nuda sub altæ
Tegmine fagi

Mol-

Mollibus herbis
Fulta recumbit
Cypria mater;
Multaque circum
Turba supraque
Plaudit Amorum.
Fusus ad auras
Vertice gratum
Spirat odorem
Crinis: uterque
Sideris instar
Ardet ocellus:
Lactea surgunt
Colla: labellis
Gratia ridet
Multa, genisque;
Fronsque sereno
Splendet honore.
Te quoque, cara
Thestyli, in arvis
Te manet alma
Mater Amorum.
Dulce sonantes
Anne recessus,

Piētaque mecum
Rura subire
Ne tibi, vita,
Sit pudor; omnes
Pectore curas
Mitte. Quid ædis
Postibus hæres,
Dura? Quid usque
Sola moraris,
Thestyli? Amantes
Roscida plantæ,
Lætæ natantum
Vita, volucrum
Garrula turba,
Grexque, genusque
Omne ferarum
Maxima sensit
Numina Matris.
Ip̄sa Menalcam
Aspice fratrem;
Iste beato
Vinctus amore
Chlorida longo
Crine decoram

C

De-

Deperit; illa
Usque Menalcam
Ardet & usque,
Et sibi carum
Non minus alma
Luce, suisque
Perdita jurat
Esse medullis.
Quid, mea vita,
Spes mea, dulci
Dulcius unquam
Credis amore?
Nescia curæ
Alma voluptas,
Somnia læta,
Carmina, avenæ,
Sistra, choreæ,
Mutua mensa,
Gratia, risus,
Fixa labellis
Oscula mille,
Cuncta sequuntur
Gaudia amorem.

XV.

A D

MARCUM CAPELLUM.

Lugete, hendecasyllabi: reposita
Antra flebilibus sonent querelis:
Lugete, Aonides; neque ullus unquam
Vestro sit modus, aut quies dolori.
Lugete, æquorei venusta proles
Benaci, undique quotquot estis omnes
Nymphæ, tuque potens Minerva, tuque
Auctor carminis o diserte Apollo.
Jucundissimus ille Marcus, ille
Vatum maximus unus Italorum,
Marcus ille, amor omnium, decusque
Brixia, Jovis unica ille cura,
Decumbens modo brachio laborat:
O faxa impia! Prave dux equorum!
Sævi quadrupedes! Scelestæ currus!
Vestra nunc opera simul videntur,

C 2

Do-

Domi quantum erat elegantiarum,
 Simul deliciæ, simul lepores,
 Simul gaudia nostra concidisse.

XVI.

Ad eundem.

EST recte tibi, Marce, care Marce,
 Dulci carmine, & ingenti beata
 Vena, & omnigena eruditione
 Primos inter habende Phœbi alumnos?
 At certe tibi debet esse recte,
 Dis carissime, gentibusque vates.
 Sumus nos memores profecto, quum te
 Primum vidimus ad nitentis oras
 Benaci ædibus in Rosinianis.
 Æger, dum rapidus caniculari
 Æstu sol fureret diesque longa,
 Fracto (fors mala!) brachio jacebas.
 Tuo tunc dolui dolore: mæstos
 Lugere hendecasyllabos; reposta
 Late flebilibus modis sonare

An-

Antra tunc docui. Affidens jacenti,
Ceu patri soboles, frequens bonorum
Quæ convenerat in diem caterva,
Dolebat tibi; & ipsa mox jubebat
Te bono esse animo; tuasque laudes
Alterno alloquio canebat, acri
Questu tam grave prosecuta fatum.
Dum mentem subit hæc imago rerum,
Adhuc & lacrimæ effluunt ocellis.
Nostin' vero hodie, quis ista tandem
Ad te scripserit? Omnis anne cura
Tibi pulsa mei est? Tuum solebas,
Pro tua eximia benignitate,
Matthiam placida vocare voce,
Matthiæ & tenuem probare Musam
Quid nunc? Haud dubito: me amas, amas me;
Quare, quid cupiam impetrare, aperte
Dicam jam tibi. Pauperum parentum
Sanguis quinque sumus, Capelle, fratres;
Quos ab unguiculis pii parentes,
Nec malis avibus, dedere alendos
Pudore ingenuo, artibusque honestis;
Civis ut bonus esse quisque possit.
Me legum studiis, patrisque Phœbi

Florentem urbs Patavina vidit olim;
Legatus patriæ meæ, beata
Nunc dego Venetorum in urbe. Fratrum
Alter, cui meliorque, sanctiorque
Stat mens, esse Dei minister ardet;
Intendit vigil alter ille merces
Permutare; domesticas tueri
Iste res, patre jam sene annuente.
Quid restat modo gentis ad perenne
Gaudium, stabilemque dignitatem?
Est frater quoque, qui mihi in medullis
Hæret, ingenio satis polito,
Antiqua & probitate diligendus:
Cajetanus hic est; diu moratus
Propter Medoaci fluentia, pulchram
Naturæ faciem, ordinemque rerum,
Atque artis medicæ sacros recessus
Gaudebat meditari; & inde nuper,
Felix merce nova, & revinctus empta
Lauro tempora, patriam revisit.
Nunc modos varios medendi, & usus
Ut discat bene, Brixienſe gessit
Ingredi Nosocomium; sed obstat
Multorum, id cupientium, caterva.

Huic

Huic tu, Marce, potes favere; namque
 Multum nomine, gratiaque polles.
 Qui præsunt Nosocomio, ecquid unquam
 Roganti poterunt negare Marco?
 Marcus est pater elegantiarum:
 Est vatum optimus unus Italorum:
 Est cura, est honor urbis; ecquid unquam
 Roganti poterunt negare Marco?

XVII.

De Sacerdote, primum litante.

AT vero illa dies adest, Joannes,
 Optata illa dies, & usque læta,
 Magnum quæ tibi detulit triumphum:
 Gaude forte tua, pioque dulci
 Spe solare metus; Deoque grates
 Solve. Te manet ara, teque Christi
 Mores, & placita, & suprema fata
 Revolventem animo, atque amore recti
 Ardentem ipse vocat Deus, Sacerdos.
 I, non thuricremam bidentis aram
 Sanguine imbuis; aut bovis, revincti

Rosis cornua frondibusque, sacrum
Transfodis jugulum. Novus minister
Creatus nova gentibus necesse est
Festas auxilia. En salutis auctor,
Qui cælo genitus, simulque terris,
En de lumine lumen, ecce Christus
Summis labitur atriis Olympi.
Pro pio grege, pro impiis litare
Deo discite Deum, Patrique Natum;
Sume pocula dia, sume sacras
Dapes, Numinis illud invidendum
Munus, quod Stygiæ verentur umbræ,
Obstupensque Deum colit Senatus.
O felix nimium, quaterque felix,
Quem tanto pietas honore donat!
At te jugis amor, vigilque cura
Sacrorum teneat, Deique semper
Dona, & jussa verere; namque functus
Hisce olim studiis, laboribusque,
Et compagibus artuum solutus,
Christi, qui subit abditus quasi alta
Nube nunc animi tui recessus,
Aperta aspicias beatus ora
In domo Patris, in Sione sancta.

XVIII.

XVIII.

A D

DOMINICUM DOMINICETI

SALODIENSEM,


EJA vos jubeo; quot estis omnes;
 Sales ingenui, boni lepores,
 Et molles numeri Catulliani,
 Novum sumite iter, novasque vires.
 Virum tollite ad astra, cujus olim
 Gentem nominibus beavit amplis
 Cæsar, nunc Veneti Patres, iisdem
 Assertis, veniens beant in ævum.
 Novum sumite iter, novasque vires.
 Virum tollite ad astra, qui vetusta
 Profecto, egregiaque stirpe cretus,
 Suopte ingenio, suisque factis.
 Non tantum æquiparat, sed unus omne
 Vincit nobilium decus parentum.
 Novum sumite iter, novasque vires.

Vi-

Virum tollite ad astra, balnearum,
Thermarumque salubrium magistrum,
Quas cum Pieridum choro probarunt
Europæ Genius, paterque Phœbus,
Et miris celebrant modis Britanni;
Gaudent scilicet his bonam salutem
Tueri, ac reparare, nec per annos
Pallentes trepidant videre manes,
Novum sumite iter, novasque vires.
Sed quid posco ego vos? Mehercle pulchra
Mecum adhuc cecinistis; at canenda
Supertunt alia usque pulchra & usque;
Nec vobis datur assequi quod opto,
Quanquam vos jubeo, quot estis omnes,
Novum sumere iter, novasque vires,
Sales ingenui, boni lepores,
Et molles numeri Catulliani.

XIX.

In Præfectum Benaccensem.

UID fumis celebrare, Musa, docti
Gaudens hendecasyllabis Catulli?
An juvat lepido vocare versu
Ad cælum Venerem? Hæc Deum voluptas
Unica, hæc hominum. Negas? Ad altum
Horridus quatit arma Mars Orontem.
Minus materiam tuo hinc lepori
Placet fumere? Multa habes canenda.
Annus purpureos tulit racemos;
Benaci nitet æquor, & Minervæ
Alluit placitas, patrique Baccho
Oras; Hadriacæ beata matris
Vigent regna. Sed integer, probusque
Dux tuos habeat jocos, Camæna,
Marcus scilicet: unus ille prudens
Benaco favet, Hadriæque; pacem
Alit, jura, negotiationem,
Artes ingenuas; & unus ille
Tuos esse aliquid putat libellos.

XX.

XX.

De Puella.

RÆSTANTI ingenio puella, salve,
Multis grata jocis, facetiisque,
Atque omni genere elegantiarum.
Salve, purpureis puella malis,
Mellitis oculis puella, salve,
Et labro tenui, breviq; naso,
Et sinu niveo, comisq; flavis.
Salve terque, quaterque, centiesque,
Milliesque, puella bella, & ultra.
Formæ nulla tibi optimæ deest pars;
Nec bonus pudor, integrique mores
Absunt. Munera contulisse certant
In te Mercuriusque, Juppiterque,
Et regina Venus Gnidi Paphique,
Et quantum est superum potentiorum.

XXI.

XXI.

De uxore Talli. (a)

EST sane tibi pulchra, Talle, conjux;
Docta, dives, & usque bella & usque;
Quæ saltat bene, quæ micante ridet
Labello, & loquitur canitque dulce,
Luditque. At si ego forte tres haberem
Huic tuæ similes, duas mehercle
Diti sponte darem, ut, furente captus
Amore, eripere ultimam pararet.

~~~~~

(a) Hoc ex Gallico epigrammate; paucis mutatis; latine reddidit auctor.

## XXII.

## XXII.


*In puerum impudentem.*

**T**ANDEM e liminibus pedem extulisti,  
Poeta lepide, & tuas puellas  
Invisis Saloi, & tuos amicos.  
Sed quid est, mihi quod videris esse  
Buxo pallidior, crocique flore?  
Infelix! Venus ulcerosa toto  
Sævit corpore, & occupavit ossa.  
Hæc forum Saloi perambulanti  
Impudens retulit mihi Cinædus;  
Cui benignus ego: meam dolere  
Sortem define, care; nulla tabes  
Hæc confluit in ossa; namque semper  
Cinædum timui, & Cinædi amores.

## XXIII.

## XXIII.

*De Neæra.*

UIS credat, bona quod Neæra falsa est?


O prædure vir! O puella mitis!

## XXIV.

AD EGREGIUM POETAM

JOANNEM GREPPI

*Bononiensem.*

Magnum Aufonii decus theatri,  
Socco, atque Æschileo potens cothurno,  
Jucundissime amice, dat salutem  
Plurimam tibi Butturinus, ille  
Scilicet tibi Butturinus arcto  
Vinclo amicitiae, licet recenti;

Uf.

Usque junctus & usque; namque utrumque  
In Musas agit, & bonas puellas  
'Ardor unus, amorque singularis:  
Dat ergo tibi plurimam salutem,  
Teque omni rogat obsecratione,  
Ut, si id forte animo excidit, quod ille  
Heri a te petiit, petitque rursus,  
Ne rursus patiaris excidisse,  
Nempe carmen. Id ille te rogavit  
Hesternæ, id rogat hac die, & rogabit,  
Id donec referas, fidemque præstes,



MAT-




MATTHIÆ BUTTURINI  
 CARMINUM  
 LIBER SECUNDUS.

I.

A D

NOBILISSIMAM FOEMINAM;

*In obitum filiola.*

UOS vultus! Quæ nunc morientia lumina cerno!  
 Quæ mihi vis morbi te, mea vita, rapit!  
 Vix hominum consors, almæ vix conscia lucis  
 Debes ergo tuum claudere, nata, diem?  
 Nec quidquam auxilii tot gentis vota tulere,  
 Primoresve anni, Pæoniæve manus?  
 Nil mea sedulitas? Nil profuit Insuber Alcon,  
 Ille Machaonia clarus in arte senex?  
 Non equidem credam; sed qua spe fallor inani?  
 Atra genis hæret mortis imago tuis.

D

In-

Infelix ! memini, quum dulce labella micabant ;  
Ludebasque meo, gratum onus, in gremio ;  
Prenfabasque patris dextram, colloque sororum  
Gaudebas teneras implicuisse manus.  
Certa pedes nivei vestigia figere ; & ora  
Assuerant superos voce vocare Deos.  
Têsa pe... Ah utinam nulla unquam pignora nossem,  
Æternum o lacrimis nata gemenda meis.  
Desine plura queri ; quid fletibus ora refundis,  
Lamentisque Deos, sæmina, sollicitas ?  
Illa nequit ( sic Dî statuere ) diutius esse  
Jam tua ; jam sanctam læta agit illâ animam.  
Prætereunte tener sic flos succisus aratro ;  
Sic rosa brumali languet adusta gelu.  
Nunc te involve tua virtute, Deoque resignans  
Quæ dedit, ipsa tuis utere consiliis :  
Consiliis hercle egregiis, quibus optima mater  
Progeniem gaudes instituisse tuam.  
Nil proprium in terris : varia vice ducitur orbis ;  
Et fugiunt celeri gaudia cuncta pede.  
Ipsa rigent nivibus, quæ floribus arva nitebant,  
Et placidum ventis statque, furitque mare.  
Mente agita, quæ, Laura, manes, quæque ante fuisti,  
Perpetuis Superûm splendida muneribus.

Si-

Siquis maternis Deus e complexibus illam  
 Præreptam summi nunc locat arce poli,  
 Nonne intacta tibi, inque diem magis aucta reliquit  
 Multa, ut des curas ferre per alta Notis?  
 Prolem oculis percurrere: ut te natalibus oris  
 Dilectam ante alias reddit, & Ausoniæ!  
 Eugeniam forma præstantem cerne: venustas  
 Quanta habitu! toto quantus in ore decor!  
 Labra rosas referunt, aurum coma, sidera ocelli;  
 Purpureas vincunt candida colla nives. (a)  
 Aptos illa quidem sancti custodibus ignis (b)  
 Mores, sed nulla rusticitate, colit.  
 Quidquid agit, quidquid loquitur, componere passim  
 Certant & Pallas, & Venus, & Charites. (c)  
 Par venit Eugenix tua Lelia: respice vultus,  
 Regnat ubi placidus cum gravitate pudor.

Jam

(a) *Brachia purpurea candidiora nive.*

Albin. In Eleg. in obitum Mæcenatis.

(b) *Viginibus, quæ perpetuum Vesta ignem custodiebant.*

(c) *Spectavit auctor illud Tibulli, El. II. L. IV.*

*Illam, quidquid agit, quoquo vestigia flectit,*

*Componit furtim, subsequiturque decor.*

Jam nitor eloquii, jam mentis amabile pondus  
Devincit tacitos sollicitatque procos:  
Frustra; siquid enim castos amat illa poetas,  
Flectitur haud ullis dura cupidinibus.  
Huic domus & res: huic doctam coluisse Minervam  
Cordi est, & nunquam non placuisse tibi.  
Quis vero Idaliis nutritum collibus, aut quis  
Annibalem genitum non putet esse Dea?  
Exprimit ille suos vultuque animisque parentes;  
Mirifice & formæ congruit ingenium.  
Huic dedit illustres inter florere sodales  
Virgineus Charitum, Pieridumque chorus.  
Tempus erit, quum magna ausus, quum docta locutus,  
Evehet egregium gentis ad astra decus.  
Deferet huic ultro fasces; & honoribus ipsum  
Grata urbs certabit tollere tergeminis.  
Natorum aspiciet connubia læta, tuisque  
Exortam natæ crescere progeniem,  
Tunc, quæ te longos servarint numina in annos,  
Laudabis, fatis sæmina digna tuis;  
Rectius & Divum soboli, quam Tantalus audax,  
Ipsa tuum poteris composuisse genus.  
Infelix mater! Numerosa prole superba  
Haud verita est magnos lædere voce Deos.  
O La-

O Latona, ait, amplexu dignata Tonantis,  
Quot reddis socii pignora cara tori? (mem;  
Vix duo: progeneras Phœbumque, Deamque trifor-  
Deinde effœtus hebet tempus in omne sinus.  
Aspice: tot fudi fœtus Amphionis uxor;  
Quid facerem summi semine læta Jovis?  
Cur tibi festa parent Thæbæ, & tua numina adorent?  
Non sum major ego dissimulanda Dea.  
Hæc Niobe: ast humeris nunquam positurus Apollo  
Arcum, tanta celer vindicat opprobria.  
Asthit acria jaculatus nube sagittas,  
Et, dum gaudet equis mascula progenies,  
Vulneribus passim confossam in pulvere sternens;  
Sustulit invisam, quanta erat illa, domum.  
Quid Niobe? Qui cernenti tunc talia sensus?  
Heu flet; mox rupes arida facta riget.

## II.

## PRÆFECTUS URBANUS

*Morbo laborans,*

ASSESSOREM, ET CANCELLARIUM

*Ita alloquitur.*

**E**GREGII virtute viri, quos dexter amavit  
 Juppiter, imperii gloria magna mei,  
 Quas vobis memori persolvam pectore grates?  
 Aut quibus extollam vos super astra modis?  
 Si placui populo, recte si munera obivi,  
 Si fovi pœnis, & pietate fidem,  
 Si placida, dum fata darent, gens pace quievit,  
 Dixitque Unanimum (a) carmina læta chorus,  
 Tanto Assessori debentur plura, tibi que,  
 Cui secreta dedit limina habere Themis.

Est

~~~~~

(a) *Pætus Unanimum Academia, Salodii posita:*

Est vobis rerum prudens, est fraudis avaræ
Plane expers animus, consiliisque potens.
Dives opis vestræ, studiisque adjutus honestis,
Præsidium Musis, Justitiæque fui.
Propterea vigui supra aurea sceptrâ beatus,
Gaudens tum placidos gentibus ire dies,
Tum recti studium, & cultas regnare Minervæ
Artes, & sanctæ fœdera amicitiae.
Hæc mea cura: mihi haud potior sit Lydia giza,
Partaque Oetæis gloria Thermopylis.
Sic canit, & diti pastor non invidet aulæ,
Si parcant tenero furque, lupusque gregi.
Sic laribus dulci advigilat devinctus amore,
Dum florere videt pignora casta pater.
Ast eadem vestrum pertentant gaudia pectus,
Credo equidem: merito mens sibi recta placet.
Vos pro re Veneta, pro religione tuenda,
Pro decore imperii mutuus ardor habet.
Fortunatæ urbes, dominis patribusque togatis
Si tanti assideant tempus in omne viri!
Volvi iterum aspiciant Saturnia secula, & omne
Finibus Ausoniis exsiluisse nefas.
Sæpe quidem Dux commissas tractavit habenas
Integer; at tenebris obruta fama jacet.

Quippe auro Astrææ mutans sacra jura minister,
Asperfit labem perfidus imperio.
Legibus ut sit honos, multi has tutentur oportet,
Regnumque alternis floret ab auxiliis.
Scilicet & navi sunt remi, vela, rudentes;
Nec clavo tantum per mare ducta volat.
Hei mihi, compositum extremo sub fine laborum,
Quis me corripuit morbus, agitque senem!
Visa Jovi hæc viridis nimium ac jucunda senecta,
Cedere si regno me sinat incolumem.
Pergite vos autem vestris bene sortibus uti,
Et merita ad patrios præmia ferte lares.
Ante alios plausus vos matrum vota gementum
Excipite: est omnis muneris instar amor.
„ Vivite felices, memores & vivite nostri,
„ Sive erimus, seu nos fata fuisse velint.

III.

FRIDERICO FEDERICIO

SALODIENSI.

70 18
19 18
E tenet urbs Patavi: studiis vigilare severis
Me dulcis genitor, forsque, Deusque jubent.
Sed me Parnassi sacra per deserta beatus
Ardor agit: nimium candida Musa placet.
Nympha placet, jaculis figat seu terga ferarum,
Seu choreas ducat, seu lavet amne pedes.
Acrisio me nata movet, turri abdita athena,
Quam ludit versus Juppiter in pretium;
Quæque orbi secto nomen dedit, ausa doloso
Ah simplex, tauro credere molle latus.
Felices nimium vates, si prisca rediret
Ætas, & Ducibus carmina grata forent.
Incolerem longos Pindi juga celsa per annos,
Tristibus atque avidis haud juga nota viris;
Communemque Deum canerem nunc bella cientem,
Nunc gremio infusum, sancta Erycina, tuo;
Vel

Vel cælo infererem victorem; aut moribus apta
Carmina gauderem sumere de medio;
Ludentesve inter Satyros, Dryadasque puellas
Ederet agrestes tibia nostra modos.
Ut sonipes præstans genere ac juvenilibus annis,
Martia si sonitum tela dedere, fremit;
Tum colla attollit, tremit artus, & micat aures
Igneus, indignans otia, frena, locum;
Sic ego, si deducta mihi quis carmina dicat,
Toto suspiro pectore Pægasidas;
Nec mentem dia placet exercere Mathesi,
Nec sacra Cujacii volvere scripta patris.
At modo non Cæsar, non Tuscis regibus ortus
Vivit eques vestrum, carmina, præsidium.
Rex donis ornat, qui regia jura tuentur,
Et quidquid doceant, utilitate probant.
Sævit amor nummi non mitior igne; nec illum
Ensis, nec rapidi continet ira Noti,
O hominum mens cæca! O pectora avara! Locuples
Dicitur esse probus, flagitiosus inops.
Ampla querelarum superat seges. Ipse malignis
Cedam temporibus, sed ratione duce.
Quid possim, video, nec grandia mente revolve.
Deficit in vasto cymba minuta mari.

Jussa

Jussa sequar patris: viridi mea tempora lauro,
Si Dīs sic placitum est, cinget amica Themis.
Me quandoque forum, me civica bella tenebunt;
Sed parta nunquam gaza opulentus ero.
Non ferar ingentes pagos & compita circum
Effusus, turba conspiciente, rotis.
Non Venetos rerum dominos, gentemque togatam,
Insignesve colam nobilitate domos.
Men' atra cura procul, ingentique tumultu,
Quo nunquam aut ædes, aut fora in urbe vacant,
Umbras camporum subeuntem & florea Tempe,
Non e muscoso defiliens lapide
Exhilaret fons, non ludens per prata juveneus,
Cornuaque intorquens, vir gregis, ipse caper,
Semifer & Pan, qui vel mutatam, aspera Syrix,
Te jubet argutos reddere voce sonos?
Heu quid vobiscum est animis, ac mentibus æquis,
Gentis honos, auri pondera, picta domus?
Commodat incertos homini fors improba honores,
Propositi nunquam, justitiæque tenax.
Ni metam, atque modum rebus statuamus amicis,
Frangimur adversis, subsequiturque scelus.
Vidi ego, cui largæ complerant horrea messes,
Far semesum avidis morsibus appetere;

Quæ-

Quæque ipsi quondam parebant, nocte sub alta,
Ah miserum, trepidos ferre per arva pedes.
Ditior est Cræso, Divisque simillimus ipsis,
Quem retinet virtus, quem ratio una movet.
Tu, Friderice, mihi ter felix terque beatus
Semper eris, virtus quem super astra vehit.
Ante diem curasque geris, sensusque seniles,
Et Pylum vincis Nestora consilio.
Intendis causas agere, & componere leges,
Pectore nec tacitas instruis insidias.
Elata nec fronte tumes popularibus auris
Fretus, nec vanas quæris avarus opes.
Si jucunda forum concefferit otia, Pindum
Continuo invisit, Thespiadumque choros;
Et Tusca gaudens cithara, fidibusque canoris,
Nectis Pieriis aurea verba modis.
Tu, seu patroni affectem, seu vatis honores,
Me potes exemplis rite docere tuis.

IV.

*In præclarissimum adolescentem, laurea in utroque
jure ornatum, cujus stemma arbor est.*

SALVE, arbos felix, venientibus utilis annis,
Salve, arbos magni numine tuta Jovis.
Jam satis Euganeos viguisti læta per agros:
Medoaci Nymphæ te coluere satis.
Nominibus donata novis, succoque virenti
Fœcunda, in patrio es rursus alenda solo.
Te Benacus alet per amœni littoris oram;
Te Salœ gremio mater amata suo.
Hic tibi, ab aeriis absorpti nubibus ignes,
Miscebunt toto murmura vana polo;
Frustra certabit Scythicis Aquilonibus Eurus,
Vel ruet in Boream vis rabiesque Noti;
Semper enim trunco immota & radicibus altis
Hærebis, medio ceu scopulus pelago.
Ut Pinus corylos inter, tenuesque myricas,
Insigne extolles semper ad astra caput.
E summi capite orta Jovis, Tritonia virgo
Impediet foliis tempora casta tuis;

Præ-

Prætendetque manu dulces, tua munera, fructus,
Vatum delicias, Socraticæque domus.
Te circum niveis plaudet pax concolor alis,
Et vacua stabit fronte serenus Amor.
Ipse suos hasta (nam Pŷchen ardet) amores,
Ipse sua inscribet cortice bella tuo.
Pro glauca myrto, pro molli flore rosarum
Unam te cupiet, te colet alma Venus.
Sæpe tua in numerum, Saloe applaudente, sub umbra
Ludet Hamadryadum, Nereidumque manus.
Prisca tibi platanus concedet, maxima cura
Xerxis, quæ ramis gemmea ferta tulit.
Cedet virga nitens auro, quam sanguine Divum
Tros satus, Euboico repperit in nemore;
Nec sese ulla tibi ditissima præferet arbos,
Quæ dedit Hesperliis aurea mala Diis.
Sed quanta hinc veniant Saloes florentibus arvis,
Benacoque patri gaudia! Quantus honos!
Non Arni, non Eridani, non Tibridis oris
Invideant, vel agris, Attica terra, tuis.

V.

In obitum doctissima famina, apud Arcades

N I S Æ Æ.

Concessit fatis, & acerbo funere mersa est
Nisæa, Aonii cura decusque chori?
Atropos iunmitis, tantæ quid stamina vitæ
Ausas es crudeli dissecuisse manu?
Quis furor ante diem, aut te livor adegit iniquus
Tam carum nobis tollere, sæva, caput?
Vix equidem credam, quoniam sacrum omne profanas,
Te posse ætheriis parcere numinibus.
Confectum est scelus: os illud mirantibus olim
Vatibus auditum, Cenomanûmque Diis;
Os illud, sæpe Æschileo memoranda cothurno
Quod verba in medium protulit, ecce tacet.
Os tacet, & torpent æterno lumina somno
Clausa, & solvit iners corpora humanda gelu.
Feralem mœsti ad tumulum, pia turba, poetæ
Fletibus uda suis florea fecta gerunt.

An-

Anxia, & indignos Elegeia fusa capillos,
Nequicquam increpitans impia fata, dolet.
Multa movens animo Pietas, complexa feretrum,
Ingemit, & terris lumina fixa tenet.
Quid querimur tamen? Anne levis te dissipat aura,
Nisæa, & misero funere tota peris?
Pars melior summi in penetrabile immissa Tonantis,
Debita supremæ gaudia lucis habet.
Fas plausu, Nisæa, tuos efferre triumphos;
Fas vectam in superas te celebrare domos.
Hic immixta Diis, Libitinæ jura severæ
Despicias, & gemitus, spesque leves hominum,
Circum audis sonitus sese volventis Olympi;
Signaque per certas aspicias ire vias.
Enifer Orion illic; hic Mænalis Arctos;
Hic Bereniceo e vertice tonsa coma est.
Hic sol quadrigas agit; hic argentea bigas
Phœbe; illic Hyades, Pleiadesve micant.
Ardua terrarum procul, imaque rura, suisque
Littoribus ponti marmora cincta jacent.
Quod si te sedes aliæ, si umbrosa vireta
Sanctorum nemorum, atque arva beata tenent;
Istic assiduum placido ver ore renidet;
Et dulci semper flore juventa viret;

Æter-

Æterni spirant Zephyri, summoque recessu
Vivus perpetuo labitur amne liquor.
Fortunata inter discumbitur agmina vatū,
Divinisque sonant carmina digna toris;
Et passim lætis datur invigilare choreis,
Castumque insigni necdere fronde caput.
Ne tamen has lacrimas sancta indigneris ab ædē,
Quas tua cum gemitu pallida busta cient.
Quis mala, quisque avidi vires sic contudit Orci,
Altius ut fati exserat ingenium?
Quis patriis ignem domibus, campisque furentem,
Aut sicco creptas lumine spectet opes?
Num te, si scopulis allisa, & vortice mersa
Sit ratis, impavidum, nauta, procella ferit?
An si intempestus toto ruat æthere nimbus,
Grandine & icta gemant arva, colone, files?
Obruimur cæca mortalia pectora nocte,
Gensque rudis, nobis nec satis æqua fumus.
Quæ sensus seriant nostros, & dulce lacescant,
Quærimus, indocti mentibus alta sequi.
Quare nostra volant celeres lamenta per auras,
Te amissa, & late ripa, nemusque fremunt.
Non aliter cara viduatus compare, ab ulmo
Quam leve pastoris stravit humi jaculum,

E

Lon-

Langum flet turtura teneri non graminis herba
Illum, non liquidi fluminis unda juvat.
Hæret pectoribus nullum delenda per ævum
Oris, & ingenii dulcis imago tui.
Tu nos gaudebas virides deducere in hortos,
Læta Stagiræi quos obit umbra patris.
Dicebas, Auster crebro cur gaudeat imbre,
Cur gelidam Boreas spargat ab axe nivem;
Utque tonans altis se nubibus explicet ignis,
Et tremat, ipsa ignis vi quatiente, solum;
Et rerum causas, indefessæque canebas
Naturæ mores, oceanique vices.
„ Lesboas Tusco percurrens pectine chordas,
Mulcebas teneris pectora nostra modis;
Teque canente, sacro plauserunt monte Camœnæ,
Naiadesque imo profiluere lacu;
Et duxere choros nexis per mutua palmis
Saltantes Dryades, capripedesque Dii.
Te quoque Pythagoras meditari arcana, senexque
Edocuit tacita mente Syracusius.
Auspice te, virtus studio certaminis arsit,
Doctaque sub rapidis fervit arena rotis.
Avia quisque alacer tendebat scandere saxa,
Qua fluit irriguo Castalis unda pede;

Lu-

=====

Lustrabatque lubens Tempe, saltusque sonantes
Divûm carminibus, carminibusque tuis.
Quam subito heu tecum decora & solatia nostra
Mors uno potuit diripuisse die!
Ut sine aquis fontes, Lunæ sine imagine noctes,
Et sine sole dies, & sine fronde nemus,
Te sine sic late squalet Saturnia tellus,
Alpinisque ululant numina verticibus.
Quid faciat? Tristis regionibus errat Apollo,
Nec tota sedem repperit Ausonia.
Quid juvat in terras insigni fraude, Promethee,
Ignem e purpureo te retulisse polo?
Ignem, quo veterum caluerunt pectora vatum,
Otia paulatim desidiosa necant.
Argolicæ intereunt artes; & Pindarus ardens,
Divinæque jacet conditor Iliados.
Ille procax mimos celebrat lasciva jocantes;
Hic canit Idaliæ furta nefanda Deæ.
Dant vacuos alii versus, jactantque canoras
Nugas; aut atro nomina dente petunt.
Indomitum sævit vulgus, morumque magistra,
Victrixque irarum dia Poesis abit.
Labitur interea, quæ floruit utilis ætas.
O hominum præceps in sua damna genus!

VI.

In carmina ejusdem;

CArmina in apricum dum se proferre parabant,
 Quæ lusit facili docta Faina lyra,
 Ecce caput pallente olea, citroque revinctum
 Summo Benacus gurgite tollit ovans.
 Vestra, ait, haud periit Nisæa; applaudite mecum,
 Najades Ausoniæ, Cenomanûmque Dii.
 Illa suo vestras etiamnum carmine ripas
 Mulcet, & æternum vincere fata docet.

VII.

In effigiem ejusdem.

Utas voce, oculis Charites, ac mente Minervam
 Exprimis, una tribus digna Faina choris.

VIII.

VIII.

A D H Y E L L A M;

Dente laborantem.

○ Penitus formosa, tuæque simillima matri,
Altera Benaci haud dissimulanda Dea;
Quid, mea Hyella, tuis lacrimæ eluctantur ocellis?
Quid strophio mœrens ora venusta tegis?
Novi: alios inter pulchros candore nivali,
Firmosque, ille niger dens tremit, ille dolet.
Macte animo, avellas: præsto est medicina; nec ullus
Posthac torquebit te, mea vita, dolor.
Quin mox candidulus surget dens alter; & ori
Ad formam haud deerit particula ulla tuo.

IX.

D E C A M P I O N E,


Ora Benacensis.

ORA est Benaci, quæ magni culmina Baldi
Prospicit, & triplex continet imperium.
Si nudas circum filices, abruptaque saxa,
Unde sonans rapido labitur amne liquor,
Fabrilesque domos, & caligantia tecta
Cernas, Vulcani dixeris esse specus.
At si constructas opibus regalibus ædes,
Aurum, & crysalli lux ubi multa nitet,
Et virides, citrisque aptos & floribus, hortos
Aspicias, sedem dixeris esse Jovis.
Ignoras tamen, an saxis & rupibus horror,
Anne loco veniat majus ab arte decus.

X.


A D . A D O L E S C E N T E M

Laurea in utroque jure ornatam.

OL rapidos quater egit equos per sidera Tauri,
Dum Patavi dulci perfruor hospitio.
Post ferme innumeros, docto quos pulvere Pallas
Exercet cupidos fronde virente tegi,
Dignum vidi hominem Phœbæa denique lauro.
Tanta vi magnum nascitur ingenium.

XI.

In anum versipellem.

UI sese facies Protheus vertebat in omnes,
Nunc fera, nunc ignis, nunc vagus amnis erat.
Sic quæ divina dicta est sub veste latere
Fœmina, multiplices induit effigies.


Vixit cara viris olim florente juventa,
 Et Venerem didicit mille ciere modis.
 Saga fuit: mox mimorum subnixa cathedris;
 Ficta nunc homines religione capit.
 Credula anus, misera Venetos qua fraude laceffis?
 Lena esto: hoc restat denique subsidium.

XII.

D E

ANDREA GANAZZONIO


Archiepiscopo Corcyrensi.

 Ergama conciderant, variisque erroribus actus
 Rex Ithacæ Ionio vela dabat pelago;
 Cum portus, Corcyra, tuos intravit; & illum
 Plausibus excepit læta manus juvenum.
 Nunc ad te veniet nulli virtute secundus
 Andreas, crines cui sacra vitta tegit.
 Ni spernis præ Grajo Italum, præ Marte Minervam,
 Hic tibi erit cunctis sanctior hospitibus.

XIII.

XIII.

De Præfecto provinciali.

UI dulci imperio, & sancto moderamine legum
Nos regis, o Venetum gloria, amorque patrum;
Atque inter populum constanti fœdere junctum
Justitiam, atque artes, Aonidasque foves,
Accipe, læta tibi recinunt quæ carmina vates,
Neve indigneris, quod leve munus habes.
Est omni pro laude satis tua maxima virtus,
Credo equidem, & laudes dicere nemo potest,
Aut tantum ille potest, dederit cui magna sonare
Facundæ inventor flavus Apollo lyræ.
Vatum at si spectes animum, studiumque, fidemque,
Omnibus hæc præstant munera muneribus.

XIV.

XIV.

DE TINTINNABULIS

A R U F I N I O,

Egregio artifice, conflatis.

ÆRA fumus: patrias nomen *campana* per oras;
Et raucos sonitus ære repulsa damus.
Nos ignis, nos tempestas, non furta verentur;
Cimus & absentes ad sacra templa viros.
Si pendis, si metiris, si singula tundis,
Pondere differimus singula, mole, sono.
At si septem una crebris tinnitibus auras
Pulsamus, gratos accipis aure modos.
Nos mira egregius fudit Rufinius arte,
Æræ quidem, at tanti nomine clara patris.

XV.

XV.

Inscriptum in Templi foribus.

Augustæ Triadi fanum, Mariæque dicamus:
Deferat hæc nostras, audiat illa preces.

XVI.

Ad manes nobilis cujusdam viri,


*Quum capite plectenda essent ejus soror, quæ ipsum
occiderat.*

DUM tua, Cenomanûmque jam stetit urbe, vetusta
Lapsura est fulgens nobilitate domus,
Hoc decrat tibi, vel post fata miserrime Frater;
Talem ut nunc esset mortem obitura soror.
Abstulit heu nobis hujus te dextera; at ipse
Pro pietate tua, ac gentis honore tuæ,
Credo equidem, si qua est post lethum cura, sororis
Altius ingemeres, quam tua fata, necem.

XVII.


XVII.

De pace.

 Mbris Elysiis, & summi vertice Olympi
 Dî sacra perpetuæ fœdera pacis amant.
 Pax colit & terras; sed belli cæca Prometheus
 Pectoribus hominum semina supposuit,
 Quæ simul erumpunt, custos prudentia pacis
 Cedit, vis sanctæ cedit amicitæ.
 Felices, stabili quos Juppiter æquat amore!
 Ipsam homines possunt vitam agitare Deum.

XVIII.

De sacro Pastore:

 UI tibi dux fuit ad fontes & pascua dia,
 Septisque excubuit nocte dieque tuis,
 Sollicitus, ne te lethali infecta veneno
 Gramina, neve lupus falleret insidiis,
Egre-

Egregius pastor, nulli pietate secundus,
Postquam supremum mortis adivit iter,
Jam satis a te habuit lacrimarum: parce querelis
Littora Benaci, & celsa replere juga.
Maeste, age: qui pastortibi, grex, conceditur alter,
Jam desiderium leniet iste tuum.
Hic bonus, hic recti custos, hic acer in hostem;
Amissumque animis, moribus, ore refert.

XIX.

In querelas caci ejusdem poeta.

REGIA pompa nitet, medias spectanda per undas;
Ardua que insolita luce theatra micant.
Nocte Forum præbet spectacula digna Tonante.
Jure omnes plaudunt, jure poeta gemit.

XX.

XX.

De summo quodam viro.

TU Lojolæam potuisti evertere turrim;
Sed te mole sua, dum ruit illa, premit.

XXI.

IN NUPTIAS

A LOY S I I P I S A N I

E T

J U S T I N I A N Æ P I S A N Æ.

NUBIT Pisano auspiciis Pisana secundis:
Neutrum aliter jungi fasque decusque tulit.

XXII.

XXII.

A D

VINCENTIUM DANDULUM.

D Ergeminam ducit sapiens vir, Dandule, vitam.
Ille sibi, ille homini vivit, & ille Deo.

XXIII.

MARCO CAPELLO

BRIXIENSI.

D Urum est infirmo stratis recubare lacerto,
Dum furit æstivo Sirlus igne canis.
At dum conveniunt cari te semper amici,
Flentque, tuoque omnes, Marce, dolore dolent,
Dumque tuas illi laudes, tu carmina dicis,
Non doleo ipse tibi, Marce, sed invideo.

XXIV.

XXIV.

Eidem.

NOS quoque amant Superi: Phœbus te luce ferena
Juvit adhuc, valido membra calore fovens.
Sed quoniam nunc, Marce, paras nos linquere, nobis
Præsto est, & pluvio Juppiter axe tonat.

XXV.

Eidem.

Quid cecini? En nubes se purgat in aera apertum,
Et redit inducto candida sole dies.
Marce, vale; & nimbos qui præsens æthere abegit,
Te patriæ reddat Juppiter incolumem.
At qui te flerunt, qui te mirantur, eorum
Fac tibi sit memori condita corde fides.

XXVI.

XXVI.

De Amica.

L Brioli illi oculi, mea dulcis Thestyli, & illa
Alba verecundis lilia mixta rosis,
Quæ blando ore refers, prorsus mihi surpuerant me
Et mea replerant corda cupidinibus.
Quid facerem? Accessi ad te, vita, tuisque pependi
Attonitus toto vespere ab alloquiis.
Ingenii mihi tum patuit vis mira; tuique
Sese virtutes explicuere animi.
Qui prius ardebam solius imagine vultus
Captus, nunc quanto torquear igne, vide.

XXVII.

De eadem.

ET me amat, & tacito me Thestylis excipit horto
In noctem: trepidum me, Venus alma, rege.

F

XVIII.

XXVIII.

De Neæra.

V Irgo Neæra domi, virgo est quoque principis u-
 Uxor Damonis facta, repente Lupa est. (xor.

XXIX.

De eadem.

I Æ divitem benignitas fecit mea:
 Suis Neæra postibus
 Inscriptit. Utilem, puellæ, discite
 Benignitatem persequi.

XXX.

In quoddam spectaculum.

Q Uæ, Michael, conducto infers spectanda theatro?
 Quæ stridet miseris vox sociata modis?
 Antigone hæc est? Ille sacro Hæmon fœdere junctus?
 Impius iste Creon corpora in exanima?

Mi-

Miror: nam dum flent illi, dumque iste minatur,
Gens late rifus, sibilaeque ingeminat.

XXXI.

Ad Iovem de faminis:

Uppiter, aut forma, aut excellat foemina tantum
Ingenuo: alterutrum corda sat excruciat.
Utrumque huic donans, non gaudia nostra videris
Progeniemve hominum velle, sed excidia.

XXXII.

De egregio oratore.

Argenti orta siti male sana calumnia, culpis
Ausa est ingenuum dedecorare caput.
Stant simul ira aliena, & vis, & gratia in ipsum:
Frustra; cuncta potens dissipat eloquium.

XXXIII.

*Famina verba**In Poetas.*

DO fabro, do tonfori, do pharmacopolæ,
 Liſtorumque placent, lignipedumque tori.
 Interdum pathicis etiam me dedo poetis,
 Quorum me multum lingua petulca mover.

XXXIV.

De Matre Spartana;

EX GRÆCO POLITIANI:

Ugnaturo aptans nato generosa Lacæna
 Scutum, cum hoc, inquit, nate redi, vel in hoc. (a)

XXXV.

~~~~~  
 (a) Idem aliis verbis; alioque metro retulit Ausonius


Epigr. 24.

*A quo illud suum fortasse duxit Politianus;*

## XXXV.

*In Phabum:*


EX GRÆCO HOMERII:

Erte, Pœbe, canit te cypnus dulce sub alis,  
 In ripam infiliens, resonantem vortice ad amnem  
 Peneum; arguta & fretus testudine cantor  
 Suaviloquus primum, postremumque usque canit te.  
 Sic autem, Rex, salve: oro te carmine supplex.

## XXXVI.

*In Venerem armatam.*

EX GRÆCO POLITIANI.

Uid læva clipeum tollis, dextra & quatis hastam,  
 Pectora lorica, & casside tecta caput?  
 Non tibi, dulcis & alma Venus, sunt munera belli  
 Jam delata: præs mollioribus ipsa toris.  
 Non equidem ad pugnam, sed Martia tela capesso,  
 Pugnae ut Mars curam deleat ex animo.

F 3

Sic

Sic etenim in me una Venerem Deus, armaque nactus,  
Nunquam erit, a thalamo ut secumbet ille meo.

## XXXVII.

*Idem strictius.*

**N**duit arma Venus: sic nunquam Marte carebit;  
Nil etenim hic, Venerem præter, & arma, cupit.

## XXXVIII.

*In senem.*

## EX GRÆCO ANTIQVO:

**Æ**dis utrumque, atrum Ditem, Phœbumque  
nitentem:

Illum quod fugias, hunc quod adhuc videas. (a)

(a) Idem epigramma latine redditum exhibet Jacobus Stelli-  
ni in suorum opusc. vol. I. p. 263.

## XXXIX.

## XXXIX.

*In senem**Jam lumine captum.*

EX GRÆCO POLITIANI,

*Ad antiquum illud alludentis.*

**N**Eutrum lædo: etenim nec pars extincta tueri  
Phœbum, nec Ditem viva movere potest.

## XL.

*De rerum universitate.*

EX ETRUSCO.

**D**I spectatores; tellus ducenda theatrum;  
Inductus scenis histrio, quisquis homo est.

## XLI.

*De Turno.*

E X E T R U S C O.

**M**E mea fata domant, non Tros: hæc si equa fuissent,  
 sent,

Nunquam cessisset Daunia dextra Phrygi.

## XLII.

*De Xerxe.*

E X E T R U S C O:

**T** sese æquaret Dīs, lati stagna profundī  
 Rex trajecit equis, navibus alta juga.

## XLIII.



## XLIH.

*In invidiam:*

**N**Equicquam mihi, sæva, studes aspergere labem,  
Invidia: e labiis vana venena fluunt.  
Ceu ferro sacras Eresichthon lædere silvas  
Aufus, te laceras dente cruenta tuo.  
Ardua me conantem ultro, & præclara volentem  
Aspice, cui Phœbus munera multa dedit.  
Ridere assuevi miseros, quos crebra repulsa,  
Incumbensve odiis torqueat ambitio.  
Ut fremitus audire tuos placet, improba! Non sic  
Laude quidem lætor, non pietate virum.

## XLIV.

*In Faustum.*

**A**Tro quis te dente petat nil tale merentem?  
Es, mi Fauste, bonus, terque quaterque bonus.  
Nam quid agis? Sola hæc nimis a te, pupule, amantur:  
Alca, mensa, puer, fœmina, strata, merum.  
XLV.

## XLV.

*In eundem.*

**E**S miles bonus, & nulli, mi Fauste, secundus;  
Vina mera epotas semper, & exululas.

## XLVI.

*In eundem.*

**B**ellus es atque ornat te, Fauste, thalassina vestis;  
Ast unum hoc doleo, deesse tibi auriculas.

## XLVII.

*Ad Corydonem.*

**Q**uid mirum, Corydon, dum tot te Juppiter ornat  
Muneribus, Lygdæ me placuisse magis?  
De te multa soles Lygdæ tu dicere: multa  
Olli de Lygda dicere ego soleo.

## XLVIII.

## XLVIII.

*Ad Amicum.*


Scilicet & tibi tristitiam fero, care sodalis,  
Et vitæ abduco te ratione tua.  
Nam, simul Hesperio merfit sol æquore currum;  
Et prima egelidæ tempora noctis eunt,  
In Veneta, cui vix componitur altera in orbe,  
Late æquis strata marmoribus platea,  
Tu cum dilecto jamdudum incedere amico  
Assuesti, & Zephyris, alloquioque frui,  
Et turbam spectare virum, quæ juncta puellis  
Itque reditque, agris ceu seges acta Noto,  
Et curas ridere leves, & carpere mores  
Prudens, dum te aliquis fors vocat illepidum;  
Laudo; nec doleo, si me quandoque relinquas,  
Quem sacer, ah, tacita morbus in æde tenet.

## XLIX.

## XLIX.


*De inclyto quondam viro,*

*A quo plurima auctōr beneficia acceperat.*

 Ars genuit me, pars docuit, pars iuvit amice:  
Cunctorum officium tu, bone Marce, facis.

## L.

*De eodem.*

 Ngentes curas, & splendida vota relinque,  
Et placidum, spreto gurgite, litus ama.  
Te tua rura juvent: agros invise paternos,  
Et cole, Marce, hortis otia grata tuis;  
Aut campos lustra, qua se explicat aurea messis,  
Vel nivea immisso surgit ab amne seges.  
Te sequar; & gaudens viridi mea Musa recessu,  
Complebit lætis aera carminibus.

Te

---

Te silvæ, te, Marce, lacus, te saxa sonabunt,  
Te fons alpestri defiliens filice.  
Aram component Fauni, Dryadesque puellæ;  
Teque suum agnoscet rustica turba Deum.

## LI.

*Ad aves.*

○ Mihi dilectæ, o viridem concentibus oram  
Mulcere assuetæ, cur tacuistis, aves?  
Quas hisce arbutis passim insiluisse videbam,  
Cur alta nemoris parte latere juvat?  
Nonne datum est vobis hæc vitam vivere cælo,  
Aucupii tutam semper ab insidiis?  
Non hic fons semper? Non hæc placuere ligustra?  
Sed vestræ, ah, patuit jam mihi caussa fugæ,  
Huc oræ dominus venit; vos terruit ille,  
Incedens crocea fulgidus in chlamyde.

## LII.

## LII.

*De quodam oratore.*

**T**uncum posse loqui miraris? Nonne dedere  
 Chaoniz quondam divina oracula quercus?

## LIII.

*De alio.*

**I**gnis hic Orator: mirum est, qua præditus arte  
 Assurgat; sed sæpe altis levis enatat auris,  
 Eluditque oculorum aciem, ardoremque sequen-  
 (tum:

## LIV.


*De alio.*

**H**oc dicente, patrum maduerunt fletibus ora.  
 Quis, ni transfiliat metam, præstantior illo?  
 Discite, caufidici; sed vos trepidate, clientes:

## LV.


## LV.

*De alio.*

 Rojicit ampullas, dum regia jura tuetur.


## LVI.

*De alio.*

 IC est ore suo, ast aliena mente locutus.

## LVII.

*De alio.*

 Uid tanto exululat dignum vox ferrea hiatu?  
Ah quoties nugas, & pingue sonantia verba  
Jaçtavit! Fuit orator, sed vel semel, aut bis.

## LVIII.

## LVIII.

*De aliâ.*

Unc scenis aptum, Venus aurea duxit in aulam;

## LIX.

*De aliâ.*

Judicium huic anceps, mala mens, oratio hiulca;

## LX.

*De aliâ.*

Audax orator nihil hic deferre recusat:  
Igneus est animo vigor; at non certa manet mens.

## LXI.



## LXI.

*De alio.*

**R**ugibus hic nunquam paleas sejunxit inanes.

## LXII.

*De aliq.*

**S**ultitia alterius, plebisque hunc reddidit ardor  
Insignom: belle narrat, distinguit acute;  
Illius eloquio sed desit mascula virtus.

## LXIII.

*De alio.*


**I**ngenio tumet iste suo, rapidusque profundo  
Ore ruit, qualis prærup to e vertice torrens,

G

LXIV.

## LXIV.


*De aliis*

c, Protheo similis, formas se vertit in omnes,  
 Callidus, ingenio præstans, sermone disertus;  
 Sæpe tamen levis invitâ puer exitit arte.

## LXV.

IN STATUAM EQUESTREM  
 LUDOVICOMAGNO  
 POSITAM

*Lutetia Parisiorum in Foro Victoriarum.*

uspiciant alii toto spectacula in orbe.

Unus plura mihi tu, Lodoice, refers. (a)



(a) Hoc fortasse nimis amplum, sequens autem distichon nimis acre videri potest. Animadvertendum tamen est, hic locutum esse Parisiensem hominem, ibi vero Vasconem.

## LXVI.

## LXVI.

*In eandem.*

**A** Ere suspensam Lodoici cerne coronam.  
 Incertum, an Genius deferat, an rapiat.

## LXVII.

*In inferias*

## BALTHASARIS GALUPPI.

**Q**Uæ quondam, in numerum passim spirantibus  
 Læta tuos cecinit musica turba modos, (auris,  
 Nunc ad feralem tumulum, quem mæsta paravit,  
 Inferias celebrat, docte Galuppe, tuas.  
 Si tibi, dum sonitus astrorum, Balthasar, audis,  
 Non possunt veteres forte placerechori,  
 Te moveat saltem sociorum antiqua voluntas,  
 Quique alto gemitus pectore ducit amor.

G 2

LXVIII.

## LXVIII.

*Ad Sponsam.*

Cesserat auxilium, Musæ quod sæpe tulere,  
Cesserat alma salus, cesserat omne bonum;  
Nec patriæ poteram, nec caris fidere amicis;  
Morbis & urebat me magis atque magis;  
Ægraque languidulo fugiebat corpore vita;  
Quum numen dixit, vive diu, atque vale.  
Tu ~~erripis~~, mea sponsa, Deus; tibi pectore ponam  
Aram, qua mea mens, hostia læta, cadet.  
Dumque cadet, veterum deterfa labe malorum,  
Grato perpetuum sparget odore rogam.  
Huicaderunt Charites: viridem feret altera ramum,  
Altera splendorem, tertia lætitiâ.



MAT-

---

MATTHIÆ BUTTURINI

CARMINUM

LIBER TERTIUS.

I.

IN NUNTIAS.

*Hymnus ad Somnum.*

**N**OX silet alta: polo lucēte vagā sidera aperto;  
 Purpureoque tenet medii fastigia cæli  
 Phœbe invec̃ta iugo; & ventis substrata serenīs  
 Accipiunt tremulam Benaci cœrula lucem.  
 Non strepitus, non vox campis sonat ulla fœtarum,  
 Non avium: rores bibit herba; & multa sīlentes  
 Sub Jove tranquillo passim sedet umbra per agros.  
 Vicino tantum saxo gemit intus aquæ fons:  
 Nympham flere putes ima sub rupe latentem;  
 Et frondes tenui motat levis aëra susurro.  
 Somne, quies rerum, curarum, Somne, levamen,  
 O quid agis? Præstat ventos æquare volando,

G 3

Cim-

Cimmeriique specus tacitos liquisse recessus.  
Siqua hominum; Jovis alme gener, te cura quietum  
Sollicitare potest, propera, & quos flore rosarum  
Ornatus genialis habet torus, aspice Sponso.  
Aspice: nam quis luminibus te, Somne, carere  
Dixerit? Ipse avidos in pulchræ conjugis ora  
Intendis visus, inhians; gremioque repenti  
Infusus dominam laudas, & suavia poscis;  
Atque ita, credo equidem, lentæ colis optia vitæ,  
Perpetuusque alitur labefacto corpore languor.  
Nunc mecum Sponso, mitissime Somne, tuere.  
Forma ambo insignes, annis florentibus ambo,  
Jucundaque ambo capti novitate, vicissim  
Optatum exercent hymenæum; est flamma medullas;  
Osculaque infigunt, cupidisque amplexibus hærent.  
Non aliter Paphiæ volucres, ubi mollibus auris  
Laxat ver animos, & cælo ridet aperto,  
Aeria de turre volant, plausuque secundo  
Circumeunt sese: raucum ferit æra murmur;  
Inque vicem attollunt niveum caput, uda rogantes  
Oscula: stant alæ; miscentur mutua rostra.  
Nec satis hæc Sponsis: juvat indulgere labori  
Assiduo; vehemens it plurimus ossa per ima  
Spiritus, & lassi manant sudore lacerti.

Re-

Remigio alarum, & Lethæi pondere tustis  
Noctæ Deus, frontem cui molle papaver obumbrat;  
Non, qualem cecinit veterum plebs, Noctæ, sed ipsa  
Progenite Astræa, pacis rectique sequester;  
O vitæ melior dux, qui genus omne animantium  
Naturamque fovens, rerum cum Sole suprema  
Dividis imperia; o Divûm placidissime Somne,  
Quæso, veni: vates orat te carmine supplex,  
Sollicitus, patriæ ne spem necet improbus ardor  
Devictus pietate tua, pro viribus ille  
Nigra tibi patriis altaria ponet in oris,  
Quæ crebri tepido conspergent sanguine glires.  
Ergo veni; & thalamum suspenso poplite furtim  
Accede, aut levibus te tolle per æra pennis;  
Dumque olli multa hærentes vi prælia miscent,  
Labere, & obrepens tacito per viscera flexu  
Insinua, placidoque jecur perfunde sopore.  
Fessos solve oculos, trepidisque allabere venis,  
Concilians animos; indeprensusque pererra,  
Somnia blanda ferens, pressaque silentia penna.  
At tuus ambigua volitans sub imagine Morpheus,  
O pater alme, vera, ne gaudia mollia fingat,  
Et rapidis agitet languentia pectora formis.  
Menti, si mavis, facies placidissima ruris

Occurrat, vitreique lacus, collesque supini,  
Grex ubi balantum reptet, luctansve juveneus  
Exsiliat; riguique fluant per gramina rivi.  
Sponsus silvofum lustrare indagine Baldum,  
Venator non infelix, prædaque potiri  
Gaudeat; aut tenui mediterur carmen avena  
Turba pastorum in media, videatque, magistro  
Phœbo, plaudentes umbroso Helicone Camœnas:  
Ducat sponsa leves, Nymphis immixta, choreas  
Ad vada Benaci, aut Athesis labentis ad oras;  
Purpureosve legat flores, nectatque coronas;  
Perque fores animi passim ludantque, micentque,  
Ac remeent tenues species, & inania visa.  
Eja age, rumpe moras; his, te licet ultro repellant,  
Adfer opem, mollique ignes restingue quiete,  
Compositosque riga, suffectis viribus, artus.  
Si cessas, teneros sternet Venus acris amantes;  
Et quæ nunc Charites Sponsis hædere decoris  
Certant, ah gemitus educent pectore ab alto  
Divulsæ, implebuntque gravi memora avia questu;  
Quin formosus Hymen, cui fervida vota juventæ,  
Cui sacra jura tori, & vitalia semina cordi,  
Flebit, amaracino spoliatus flore capillos;  
Pineaque ante diem cinis ater tæda jacebit.

II.



## II.

*Mopsi pastoris laudes.*

**L**ittore Benaci, & Saloi vix distita ab urbe,  
Hesperium ad solem, patri dilecta Lyzo  
Dulcia rura cubant; quorum vetus incola vates;  
Nunc fidibus, nunc agresti lætatus avena,  
Astantum arrectas tenuit Bonfadius aures  
Faunorum ac Dryadum. Genii memor, aurea Musa  
Œtam servat adhuc. Tumuli de vertice pastor  
Hic audit Clisis sonitum per saxa ruentis;  
Et freta Benaci procul, atque albentia vela  
Prospeclat, nantesque rates tranquilla per alta.  
Huc æstate nova pastum Melibœus agebat  
Sæpe boves, calamoque pecus mulcebat, & agros.  
Laudibus assiduis, meritòque colebat honore  
Ille senem Mopsum gratus puer: ardua saxa,  
Valles, quæque fugit mediis in vallibus unda,  
Arvaque dilecti referebant nomina Mopsi.  
Ille, cadente die, cæli e regione serena  
Spirantes Zephyros, & amabile frigus in umbra

Ca-

Captabat; dulci quum talia voce canentem  
Audivere suis Nymphæ Gazanides antris.

O ingens ruris decus, o Jovis unica cura,  
Si nos, nostraque amas, memorem pastoris avenam,  
Silvestrisque rudes Musæ ne despice cantus.

Carmina, Mopse, doces nos dicere; carmina dicam,

Et te, Mopse, canam: bonus ad sis, quæso, canenti.

Quis non te cretum Corydone, & Phyllide Nympha  
Agnoscat? Posuit Corydon altaria Phœbo,  
Quæ tot muneribus, tot cæsis imbuat aguis,  
Pastorum Corydon doctus componere longa  
Jurgia, Pastorum Corydon mitissimus unus.

Phyllis amor patriæ, Nympharum gloria Phyllis  
Conciliare animos, & devincire merendo  
Gaudebat, seu pastor erat, seu rustica mater,  
Seu virgo agricolæ, vel tardo nupta bubulco.

Talia longævus memoravit sæpe Menalcas  
Ad rivum, dum messiserat, dum frigus, ad ignem.

Carmina, Mopse, doces nos dicere; carmina dicam.

Mille tuæ pecudes jucunda per arva Liani  
Errant; nec Superis est te dilectior alter.

Plurimus exercet fossor tua rura: quotannis  
Fronde satur pretiosa tibi dat stamina bombyx;  
Inque diem portant agrestia munera Nymphæ,

Fru-

Frugum primitias, aut venatore marito  
Extinctum leporem, vel olentes flore quasillos.

Carmina, Mopse, doces nos dicere; carmina dicam,

Et te, Mopse, canam: bonus adsis, quæso, canenti.

Tu pagi oraculum, tu lex, tu numinis instar.

Quam pauci norunt urbani iudicis ora

Agricolæ! Sanctis ediscunt moribus uti,

Clamoresque fori Mopso vitare magistro.

Hinc matrum atque nurum rixæ, hinc odia aspera fra-

Atque in finitimos veteres abiere querelæ. (trum,

Candida pax nostris æternum regnat in arvis;

Et sæpe instaurant spectacula festa coloni.

Carmina, Mopse, doces nos dicere; carmina dicam.

Tu calamos inflas, citharam tu pectine pulsas;

Et fugiens passim stetit ad tua carmina rivus.

Dulce gregi nunc umbra, calor nunc dulce cicadis,

Dulce viatori nunc fons, tua carmina nobis.

Venit ab Elysiis, patriis & vescitur auris

(Unus hic est sermo, vox hæc pastoribus una).

Qui quondam corylos, & fortunata canebat

Antra Coloniolæ: vestrum cognoscite vatem,

Gazani fruticeta, sacri nemora alta Liani.

Carmina, Mopse, doces nos dicere; carmina dicam,

Et te, Mopse, canam: bonus adsis, quæso, canenti.

Mi-

Mirati agricolæ vatem audivere docentem,  
 Ut vel juncorum, vel caricis uber acutæ  
 Promittat fontem tellus; ut aprica vireta  
 Pervolet, & pingui flores apis ingerat alveo,  
 Et sua jura, suos agnoscat quæque labores;  
 Ut Cerasus lætam in prolem ab radicibus imis  
 Pullulet; & fructus meliores proferat arbos,  
 Quam plenus sol in campo fœcundat apertò.

Carmina, Mopse, dices nos dicere; carmina dicam.  
 Chloridis ipsa meo fugiebat pectore imago,  
 Dum mihi speluncas & amœnam Tiburis umbram  
 Laudabas, unde Ausonii venere coloni,  
 Et fuit illa potens armis, illa inclyta Roma,  
 Mansura incolumis (dixisti hæc pastor) in ævum,  
 Siquid virtutis patriæ Pharsalia rura  
 Forte reliquissent cum libertatis amore.

Carmina, Mopse, doces nos dicere; carmina dicam,  
 Et te, Mopse, canam: bonus ad sis, quæso, canenti.  
 Tu me formasti studiis, quibus optimus olim  
 Florebat Corydon, nunc te florere videmus,  
 Et mox ille tuus surgens florebit Amýnthas.  
 Auspice te, nuper templi in penetralibus altis,  
 Intonso patri quod gens antiqua sacrauit,  
 (Mens memor ardet adhuc) insucto percitus æstro

Car-

Carmina composui; tum cinctus tempora lauro  
Multorum accepi plausus, atque oscula matris.

Carmina, Mopse, doces nos dicere; carmina dicam.  
Eurimadam docuit Thyrsis; sed vix tibi, Mopse,  
Ausim ego pastorem componere Thyrsida, quamvis  
Et pecudes curare, leves & dicere versus,  
Et labio argutas norit percurrere avenas.

Cedit quantum ignes Lunæ, Solique minores,  
Cupressoque siler molle, exilesque myricæ.

Eurimada infelix! Nequicquam Pana vocasti;  
Ter repetita tui nequicquam verba magistri  
In noctes alta tendebas figere mente.

Namque sacerdotes divinæ ad limina sedis  
Pertentantem aditus, & carmina multa ferentem  
Ter te rejiciunt, Phœbique recessibus arcens.

Carmina, Mopse, doces nos dicere; carmina dixi,  
Et cecini te, Mopse: sat & voluisse canenti.  
Finierat, sed mentem puer majora parabat.

Dicere, nescio quid Musa meditatus agresti

Altius. Interea tacito surgebat Olympo

Hesperus; hic saturum pecus ad præsepia cogit;  
Discessuque boum sonuit mugitibus ora.

III.

*Æstas.*

**V**ER adeo silvæ, ver almis utile campis  
 Jam satis & plantas, & bruta, levesque natantum  
 Vitas in venerem rapuit. Fuit aurea cæli  
 Temperies, mundique vigor, terræque juventa.  
 Sat rivos, vitreosque lacus, & florea Tempe  
 Vidimus; & gracili meditati carmen avena,  
 Egelidum volucres dum cantibus aera mulcent,  
 Saltantes Dryadas molli deduximus antro,  
 Nunc res magna trahit vagus in discrimina Titan.  
 Nonne vides, æstas ut hiuleis extulit arvis  
 Pulverulenta caput? Zephyris auraque salubri  
 Ripa caret, siccisque tacet deserta fluentis.  
 Sola, Rotinge, strepunt raucis arbusta cicadis  
 Ardentem ad solem, & cantus nemora avia reddunt.  
 Roscida non pubent tenui violaria succo;  
 Non flos narcissi, vel suave rubens hyacinthus  
 Prætereunte comas attollunt amne; nec ullos  
 Conjugis in gremium demittit Juppiter imbres.  
 Jam squalet tellus; jam torridus æstuat aer;  
 Jam

Jam facitus vasto consistit in æquore Nereus.  
 Qui lentas præcal egit oves ad flumina nota  
 Pastor, membra gravi exsolvit sudantia amictu  
 Anxius, & nudat media plus parte lacertos;  
 Defessusque sub aëria prosternitur ulmo  
 Cum grege languidulo non plantæ incidere amores,  
 Non versus canere, aut tenues inflare cicutas,  
 Nec gracili curat fuscillam texere hibisco;  
 Brachia lassæ jacent: sonat acer anhelitus ore,  
 Quæ Dea succinæ studiis addicta Dianæ  
 Insidiis valles, aut edicta claudere resquæ?  
 Quis vestrum, Fauni, cupido cinxisse puellam?  
 Gaudeat amplexu? Tenerorum mater amorum  
 Deficit; & rapido succumbunt membra labori.  
 Si lentus, dum cuncta silent, spatieris aperta  
 Ad vada Benaci, interdum spirantibus auris  
 Lenimen curis, longisque caloribus una  
 Ferre potest nox; at celeri fugit æx, diemque  
 Ignavo captus somno placidoque cubilli  
 Tardus sæpe dolet subito illuxisse viator.  
 Nititur incurvo terram proscindere aratro  
 Agricola; at perstant arantibus aspera glebis  
 Jugera, nec rigidos admittunt vomeris ictus.  
 Sistite anhelantes sub inani pondere tauros,

O mi-

O miseri, fessasque domum revocate puellas.  
 Nos premit ira Deum, patriumque inflammat Olym.  
 Placanda ante aras precibus, cœsaque juvença, (pam,

## IV.

## DOMINICO CONDULMERO

## ERÆFACTO BENACËNSI.

**U**lchra Deum soboles, hominum sincera voluptas,  
 Seu Pindi juga, vel gemini deserta canora  
 Parnassi incolitis, Musæ; seu rupibus illis.  
 Jucundam irrigui mutastis Tiburis umbram,  
 Argutasve Arni ripas & Tusca fluentia,  
 Dum jam fata sinunt, Benaci ad littora nota  
 Omnes ferte pedem, quæso, cantusque movete.  
 Hæc laxa, hæc vitreis manantia fontibus antra,  
 Et mites auras, & amabile frigus aquarum  
 Fas vobis meminisse, Deæ, lucosque vetustos  
 Visere, qua crebræ ranca edunt murmura citri,  
 Dulciaque assueti meditari carmina, circum  
 Alta nocte volant manes umbræque Catulli.  
 Hæc satis Italiæ formosior ora, Tyrannis  
 Insubribus, multisque virum vexata rapinis

In-



Ingemuit; fatis hæc peregrinos palluit enses,  
Bella hinc Germanis, Gallisque cientibus illinc,  
Barbarus & temere cruor has infecit are nas.  
Montibus indomitam fatis erupisse juventam  
Vidimus, instructam ferro, portuque De centi  
Ereptas passim deferre per æquora menses.  
Dux modo vos revocat, qui mira providus arte  
Tristia barbaricæ delet vestigia culpæ,  
Et leges una, legumque reducit amorem.  
Olli præstantes animos, sensumque senilem  
Orta Jovis cerebro inspirat Tritonia virgo,  
Haud tamen indignans, quod duros ipse labores,  
Et longas vestro soletur carmine curas.  
Hunc ergo canite, & pacis monimenta beatæ  
Extruite huic aram,quam plurima quercus obumbret,  
Quercus, prima altrix hominum, Jovis unica cura,  
Primævum referens ramis felicibus aurum.  
Non mitis Faunus, non ortus gente Sabina  
Rex, sub Aricinis docuit quem sancta latebris  
Conjux, imperii melius tractaret habenas.  
Innumeras jam post hiemes, hoc auspice, virtus  
Fatale exilium, & sortem desuevit iniquam  
ferre, & veterem dextra petit alite sedem.  
Tigrim, Tanainque ultra, Scythiamque nivalem

H

Mit-

Mittitur omne nefas; pacemque beata per arva  
Alma Ceres segetum flavis onerata maniplis,  
Lætitiæque parens lenis sectatur Iacchus,  
Aurea pampineis cui pendet cornibus uva.  
His comites veniunt benevolentum dædala florum  
Mater, & inventrix semper frondentis olivæ,  
Et superi, quibus attollit se pomifer hortus,  
Aut silvæ parent virides, aut lucidus æther.  
Non per inæquales tacita fur nocte salebras  
Errat: jam tutum stabulis decumbit apertis  
Palantum vulgus, jam lata perambulat arva,  
Dum lætus musam custos meditatur agrestem.  
Ingeniis pax sternit iter melioribus: omnes  
Certant ingenuas vitam exercere per artes,  
Aut audent pelago, cognatæ in commoda gentis,  
Imperiique decus, pretiosas credere merces.  
Non gerit ore minas, non terret imagine pœnæ,  
Cœumve, Enceladumve premit, vastumve Typhœa  
Æqua Themis: gladium ponit, frenumque remittit  
Utilis; & nullis concordia rupta querelis,  
Et pietas antiqua redit, candorque, fidesque  
Culpari metuens, & aperto gratia vultu.  
Sed festæ noctes, & ludi, & sacra parantur.  
Vocali Triton concha vada personat alta,

Benacufque pater citro, muscoque virenti  
Implicitum applaudens udis caput exserit antris;  
Et Nymphæ, gremio quotquot complectitur almo,  
Exsiliunt, tranantque agili patris æquora lapsu;  
Quas Saloe jam prima ciet, contexere ferta  
Ante alias assueta, leuesque agitare choreas,  
Et Tusco querulas percurrere pectine chordas.  
O Saloe quantum mutata videris ab illa,  
Quam cæca ambitio studia in contraria agebat!  
Sic, ubi ductilibus scenis grave carceris antrum  
Palleat, & nigras circum nox implicet umbras,  
Vix aures notus percellit sibilus, illis  
Mutatis, rerum vultus subit alter; & ingens  
Porticus apparet distinctis alta columnis,  
Regum clara domus, meliorve occurrit imago  
Camporum, Tempeque soli. Tacet inscia turba,  
Et nova miratur versa spectacula scena.

Salve, lux Hadriæ, fatis servata secundis,  
Semideum proles. Ut tu præstantibus ausis  
„ Ire per æternos ævi venientis honores  
Assuesti, pacis custos! Ut pulchra refulges,  
Hæres virtutis veræ, qua tempus in omne,  
Addicti imperio, magni viguere parentes!  
Sacris ceu quondam, posuit quos Græcia, ludis

H 2

Ex-

Exercere leves illustri in pulvere currus,  
Inque vicem est alter succedere visus, & alter  
Cursori cursor flagrantem tradere tædam;  
In patres atavis, patribusque in pignora præsens  
Sic animi vis, sic pietas traducta relucet.  
Quin patres & avos ego natis vivere in ipsis  
Crediderim, haud aliter quam si Cyllenius ales  
Egregias illorum animas virga evocet orco,  
Et passim superis permittat vescier auris.  
Quisquis picta domus penetrarit limina, & alte  
Affixas tabulas, veterumque ex ordine avorum  
Spirantes vultus, monumentaque cernat athena,  
Quæ gentis laudes animo, quæ facta recurrant!  
Eminet ante omnes triplici spectanda corona  
Eugenii facies. Heu sceptræ vicesque Tonantis  
Heu qua tempestate gerit! Jam fœdere rupto  
Corripuere duces hastam; jam tristia bella  
Ausoniam quatiunt. Sævitur Basilea supremum  
In patrem, atque omnes odiis immittit habenas;  
Dumque caput sacro celebris Ferraria cætu  
Tollit ovans, inopina lues, & lethifer annus  
Heu venit, & squalent exanguî corpora tabo.  
At mente Eugenius vultuque invictus eodem  
Perstat; Conciliumque Arni, mox Tibridis oris  
Pro

Pro re Romana, pro relligione tuenda  
Instituit: non ulla senem discrimina terrent,  
Non populorum iræ, non spretæ injuria sedis.  
Haud aliter duris assurgit maximus Atlas  
Rupibus: adversi luctantur turbine venti  
Ad latera; & rupti multa cum grandine nimbi  
Ingeminant: gravis it per agros fragor, icætaque late  
Robora dant gemitum. Manet ille immotus, & imbrî  
Intactum caput attollens super æthera, cælum  
Impositum latis humeris & sidera fulcit.  
Quem non Eugeni rapiat tam mascula virtus?  
Ipse etiam sacro lustratam fonte salutis  
Barbaricam gentem, tellure Libystide cretam  
Regnisque Auroræ, & concordēs mente Pelasgos  
Romana recipit navi, pelagique frementis  
Exsperare docet fluctus, & vincere fata.  
Proximus Eugenio stat Paulus. Tota procellis  
Æquora surgebant, quum Christi huic credita puppis;  
At prudens pater, haud multo post tempore, nubes  
Aere collectas, tempestatemque sonantem  
Discutit: huic rident tranquilli cærula ponti,  
Ætheriæque plagæ; Zephyrique faventibus auris  
Omnis iter liquidum placido legit æquore cymba.

Tum cœpit studiis oî florere beati,  
Prælisque inventis, & ahenis Roma figuris  
Ingenii, excudit monimenta, virûmque labores :  
Tum festa instituit celebri spectacula arena,  
Et plausu insolito Hesperidum regnator aquarum  
Insonuit Tiberis, vicinaque Tibridis arva.  
Sed quid ego hæc demum nota atque antiqua revol-  
Immensum spatiis temere digressus in æquor? (vo,  
Non levis ambitio, nec inani splendida fuco  
Gloria te, Princeps, aliorum more potentum  
Fallit; nec fas egregio virtute nepoti,  
Durum iter ingresso sponte ad sublimia rerum,  
Patres nunc alte cinctis memorare cothurnis.  
Amplis nominibus major, te gratia in urbem,  
Condulmere, manet tantum, studiumque perenne  
Conciliare homines, & devincire merendo.  
Sic nullam quærit laudem, qui totus alenda  
Cara in prole parens, mentes informet honestis  
Moribus; ast illam si faustos ante penates  
Florere aspiciat, Musisque chorisque vicissim  
Indulgere, sat est: ultra nil numina poscit;  
De natis sermo placet usque; auditque refertque  
Multa iocis super, incerta super indole multa.  
Sed

Sed tibi nec meritis distat, nec pectore Frater, (a)  
Cui lituo, bifidaque datum est fulgere tiara,  
Et Cyprias, si fata sinant, sacra ferre per oras.  
Quam læti folio nos illum vidimus alto  
Subnixum, veteres aris indicere honores,  
Divino Amramidæ similem! Quo vos quoque sensu  
Alter in alterius flexistis lumina vultum,  
Ille sacerdotum princeps, tu gentis & urbis,  
Ambo ministeriis insignes, vestibus ambo!  
O quid Splendidus nostro ac felicius orbi  
Evenisse putem, tales si regna tenerent  
Tempus in omne viri! Vos talia pectora, quæso,  
Benaco servate, Dii, servate potenti  
Ausonidum Genitrici, atque Hadriaco Neptuneo.  
Heroas heroæ creent; semperque serena  
E cæli regione comes natalibus astris  
Nobilis aspiret Genius, teneatque nepotes.

~~~~~  
(a) *Franciscus Condulmerus Episcopus Famaugustanus, quem
nuper e vivis ereptum boni omnes lugent.*

V.

Supremum, ex Christianorum religione,

Dei in homines iudicium.

Viximus, o gentes. Rerum fuit ordo; fuere
 Secla; fuit tellus, & pontus, & igneus æther.
 Venit summa dies, & ineluctabile tempus.
 Ultima naturæ quæ restat imago, Dei vox
 Facta, sonans late conclamat: surgite, manes;
 Jura suprema dari Numen jubet. Æquora ab imo
 Fundo pulsa fremunt, summisque immania saxa
 Dissiliunt avulsa jugis. Prærupta Pyrene,
 Atque Apennini saltus sternuntur, & Alpes
 Aeriæ; sonitumque ruens dat maximus Atlas;
 Turresque, & solido surgentes ære columnæ
 Procumbunt; stratisque vorax furit urbibus ignis.
 Quæ membris, quæ stipitibus, quæque ignea saxis
 Vis latuit, subito erumpit, ceu fulmen, in auras,
 Fumoque involvit cælum, & candente favilla.
 Quotquot vel silvis errabant bruta, vel agris,
 Atque angues ima frustra tellure latentes,

Ag.

Agmine flammârum intereunt; & vortice nigro
Obruta, sub nimbo deletur vita volucrum.
Heu video terras, & lati cœrula ponti
Fervere, & excusso cineres artusque sepultos
Eructare sinu. Jam membris pristina forma,
Jam reparata vetus redit in præcordia sanguis;
Passimque exciti penetrant sua corpora manes.
Quæ fuerat globus, in longum porrecta recumbit,
Arentemque refert, sublato gurgite aquarum,
Planitiem tellus; tum gens, quanta omne per ævum
Vixit, lapsum orbem vultu pallente superstans,
Sæva subit cælo venientis Numinis ora.
Aligerûm glomerata phalanx descendit ab alto;
Purpureoque Deum curru, folioque corusco
Spectandum exponit. Procul ilicet astra dedere
Cuncta locum: cedit trepidans Leo: plaustra Bootæ
Vertuntur; ferroque minax formidat Orion;
Et ferrugineo stat sol velatus amictu.
Quo vos proripitis? Quos nunc penetrare recessus
Tenditis, o miseri? Sero crimenque Deumque
Horretis; gemitusque trahuntur pectore inanes.
Crux, spes olim hominum, nimbis apparet in altis,
Sanguine adhuc sacro manans, pœnasque reposcit.
O rerum fata! O ultoris dextra Tonantis!

Dum

Dum sese in fontes effundit tota Dei mens,
Immemor e manibus naturæ frena remittit;
Cunctaque pulsa loco, nullaue coercita lege,
Qua subito via facta, ruunt elementa; nec ulli
Interea vultus remanent, nec semina rerum.
Omnia pondus iners: crevit cinis ater ubique;
Impositique sedent revolutis orbibus orbes.

F I N I S.

